



04947

序

嘗流覽古人之詩集多斷自中年以後而早年之作絕少惟杜子美東郡趨庭登覽城樓有詩眉山兄弟從其父入汴京道中有詩其他無聞焉豈詩之爲道必待學之久而後工耶前輩程泚江先生自史館入直其所爲詩固嘖嘖人口予往在京師讀之久矣及客游揚州又見其江峰集爲初年讀書江村時作而入都得於道中者附之何先生工詩之早耶夫禪家之學有頓有漸漸者節節

江峰集序

而爲之頓則豁然易以貫通是惟得之天者多耳先生聰敏過人凡文人所爲之事無不爲凡文字所有之體無不有當其在江村奉尊人水部公之訓方刻勵應制舉日事佔畢而出其餘情以爲詩其詠史懷古風格在陳正字李青蓮之間而江村十三詠乞瑤草二十二章且成於弱冠以前已足與輞川襄陽相頡頏斯豈徒求之學力耶天之所予蓋已迥然不侔矣昔錢考功以湘靈鼓瑟登第其平生嘗聞有人誦曲終江上之句卒以此受知

於主司先生之以江峰名集當時得無取此耶或
以爲流連光景江南之山浮江而來者相與數晨
夕於几案間則先生工詩之早又未必非江山之
助也竟陵唐建中



江峰集序

序

余交泚江先生逾十稔每見輒益親所謂汪汪千頃不受清濁於澄撓者迺今得讀所著江峰諸集歎從前之窺先生者猶以面也先生壯歲取巍科入禁近門第清華裘馬豪上皆固有之迺恂恂莊莊如後門寒素此余早日之賢先生者在是及乎興倦扶搖抽身勇退緹簾棊几抱膝恬吟若忘乎其身之早達而時之未央也先生詩冲澹夷猶不作劍拔弩張之態而清音秀骨象外天成其詩曰

序

一

琴道亦寂莫那及琵琶箏先生之人與集具是矣以是鳴國家之豫鳳儀麟舞可坐致之而顧欲以黑頭高尚嘯歌烟水之鄉其終能祕先生之聲響乎湘門同學弟張璪

今有堂詩集

江峰集

古今體詩九十二首

分藜集

古今體詩一百首

香溪集

古今體詩一百十四首

暢餘集

古今體詩一百六十首

目錄

江峰集

江都 程夢星 午橋

讀史四首

壯歲貴努力亦須慎其儀明鏡不藏耀緇塵
怙蔽虧賈生在洛陽早膺吳公知薦之漢庭上
何難婉皋夔文帝守成主紛更非所宜年少乃
喜事遽爲絳灌嗤長沙一見斥弔湘徒傷悲由
來露才智適爲讒口資老成蓋國器養晦姑
待時不見豫章木辨材七年期

江峰集

一

習俗易移人波流終無涯子夏謹篤士尚言
悅紛華漢後去聖久益復事驕奢石崇何如人
珊瑚邁官家錦障三十里爛熳明朝霞亦知利
吾財過眼如空花晉世不鑒戒非分且有加口
腹奪乳哺用之飼肥豕高哉謝東山豪具禁萌
芽請裘乃與綿所以子弟佳

佳字從杜
入麻韻

人各有弓冶士惟一經橫蘇頌頗有子九重皆
知名唐世尚門地敦勉寓權衡制科途轍啓設
網掩豪英惜乎王摩詰名以琵琶成光範三上
書昌黎

亦紛營錢徽知貢舉怨府至相傾子弟貴苟得豈
曰父兄榮九皋鶴則和長松風乃清翩翩韓冬郎
雛鳳能蜚聲

文心如人面所見各不同學焉得性近豈必畔西
東有宋開景運五季迴頽風導源穆伯長擴以歐
陽公大蘇所識拔萬象羅織洪荆國雖異議不以
文字攻後人拾餘唾遂列黨禁中東萊與西山蒐
選破愚聾鉅手始吐氣光燄垂長虹人勿循世論
著書聽窮通

江峰集

二

小齋雨坐

明滅亂夕霞雨脚已在樹梧竹風蕭蕭秋聲細堪
數掩卷懷幽人流螢入軒戶

構李客中對月寄故園兄弟

虛幌上新月高軒風露清故園花事好今夜在江
城鄰笛聽三弄村醪舉一觥可堪芳草路夜夜逐
愁生

至白沙翠竹江村讀書

剝剝啄啄客到門閑庭風月窮黃昏爲學日益笑

日損顧影七尺慚乾坤古人修詞或謀野高士避
世嘗踰垣文章况藉江山助詩書謾卷來江村江
村與我有夙分吾翁吾叔經寒溫兒時曾過索棗
栗眼見讀書秋樹根子弟直今漸撫壯屐齒重破
蒼苔痕整齊緗帙自位置槃陀有石安琴尊村翁
喜客送菜把兼致家釀傾餅盆執卷敬謝無事此
竭來雜誦防窺園地偏心遠客意靜天空林寂江
聲喧淘河飛來不解事舉頭導我如長言青山影
外擲秧馬爛銀堆裏吹江豚眼前好景捨書起風
帆歷歷過籬藩下帷如是足自笑在家悵怨寧非
冤石闌點筆識吾過夕陽去矣勤朝暾

江村十三詠

耕烟閣

虛閣延晴光白雲飛不去沃衍江之濱布穀鳴春
樹耦耕人荷鋤村烟深處處

香葉山堂

山堂雙古柏偶立何蒼蒼風烟飽閒曠永辭斤斧
戕衆鳥各有託于茲栖鸞皇

見山樓

連延南岸山嵐光幻無已木落雙眼空天遠一帆
駛高樓嘯清風山靈同徙倚

華黍齋

蓄畬及良晨耕穫當樂歲潔志薦馨香孝思以無
匱望古補笙詩明發恒不寐

小山秋

秋林已暑退落葉生微涼候蜚響空山中有叢桂
香淮南招隱篇千載遙相望

江峰集

四

東溪白雲亭

東亭臨水際高柳鳴春禽儵魚來忽去溪水清且
深白雲時孤飛澹蕩託素心

漑岩

林間一片石漑名非姓到積陰生層苔蒼翠々陽
好桔槔本無機俯仰亦天巧

蓀筭徑

數畝種蓀筭經春雨露足初篁解籜成穉笋尚堪
束客來坐清陰何處有塵俗

芙蓉沂

英英未零落江上明秋霞弱質不自持因風半天
斜伊人遙以怨言采芙蓉花

度鶴橋

矯矯雲際鶴翩然落沙衍石梁橫水心江海不在
遠清唳警深宵稻梁安足羨

因是菴

香界絕塵想跏趺聊寄意物論詎可齊莊生但因
彼未若老瞿曇無非亦無是

江峰集

五

寸草亭

山草春一寸春至非示恩山禽觸化機有如向我
言嘿坐孤亭中曠然天宇温

乳桐嶺

雲去四天碧山月明似水修梧被高岡舉袂落梧
子幽人夜不眠秋聲疑在耳

里中古蹟八首

董江都祠

漢初學術苦不明申韓黃老羣縱橫談經中並雜

詞賦何殊古瑟兼秦箏天人對策大儒出六經久
困今始亨平津若肯避賢路坐見濁世居然清江
都作相僅斥外牛鼎乃使雞豚烹大材小用世所
惜先民後覺尊庠黌宦遊舊蹟有祠宇辦香至走
蚩蚩氓相傳遺并未可信澄懷亦足銷浮榮春秋
三傳世漫習試問繁露誰能名風吹簾幙客正過
下帷依約當時聲

孔北海墓

墓門有無何渺茫誰見古碣撫文章一邱黃土不

足辨道危可嘆懼凶殃炎劉四百火不德國賊一
手盜紀綱公庭臣子盡私室北海獨立居中央平
生所善僅元德戲侮吉利多雌黃忌才積怨兩不
免可憐碧血沾衣裳當時誰是座上客尊中有酒
難同嘗蒼皇渴葬想艸艸不知何以埋維揚七十
二陵秋草沒歌舞銅雀傾清漳姦雄白骨誰復問
此公疑塚翻悲涼

法雲寺

東晉古寺名法雲東山謝傅宅所分唐時尚復見

雙檜刺有清籟詩人聞星移物換世愈遠至今惟
有緇衣羣豈知江左夷吾在青苔曾掃筇邊裙在
朝功業且不論揚州有埭防江瀆即此萬世受遺
愛忍於故地忘殷勤南朝士夫慣捨宅不獨何氏
讎羶葷佛前舊傳有小像沉檀一炷僧猶熏中年
陶寫賴絲竹但惜梵鼓鳴斜曛庭階土潤時雨過
芝蘭安得栽芳芬

文選樓

古今文字浩望洋會粹選擇從蕭梁當前卷帙縱

江峰集

七

披覽博望遜謝無丹黃樓高百尺在何許千秋過
眼如風狂身世惜同太子晉早跨鶴背調笙簧阿
翁自得忽自失青絲白馬來壽陽長年老死復何
益簡文嗣位徒悲傷湘東萬卷亦自喜末路爭救
邦家凶何如選書垂後世朱薨碧瓦懷滄桑小兒
勉強作解事後賢未易論低昂熟精文選求理要
誰言不蓄平泉莊

雷塘

南北割據多歷年隋文混一九有全躬行節儉日

康阜生兒獨恨不象賢
初年平陳責後主荒亾晚
節同流連江都好託夢寐
征遼自說元偶然三千宮
娃盡粉黛牙檣錦纜沿隄
牽迷樓酣宴方未了雷塘
宿草空芊芊隋家得國本
智巧天意不欲祚久延狂
魂蕩魄出昏亂英主乃啓
唐李淵春風楊柳垂線線
秋宵螢火來翩翩一坏玉
匣且泯滅白頭老圃開花
田

木蘭院

今之石塔唐木蘭窮愁王播嘗盤桓無聊寄食僧

江峯集

八

易厭鳴鐘故使過朝餐
後來作相領鹽鐵再過此
地笑復嘆爲德不卒何足
較人情未免傷飢寒八騶
得意亦傑士聲名何不防
貪殘閹黎輕薄蓋具眼東
坡嚴斷寧容寬漢朝君相
食不足戛羹轆繡書史官
盛德大業乃佳話不然思
怨無足觀龕香寂寂鐘磬
冷佛眼平等惟閒看後來
遊者莫題句碧紗黃土嫌
多端

禪智寺

曲阿處士遊揚州墓田愛向禪智求此言惑溺復

曠達小杜蹤跡尤風流牛相出鎮表書記不教拘
束從閒遊珠簾十里春風路新詩何止吟杜秋性
情豈肯愛禪寂斜陽古寺憑高樓方知天女與摩
詰拈花微笑同沉浮鬢絲禪榻亦有句三生狂態
居然收從來成佛須慧業前身初地疑勾留此間
結夏殊自適陰陰灌木當人頭妙香領取十小劫
莫待零落歸山丘

平山堂

歐公到處爲齋堂揚州結構依蜀岡政清俗化有

江峰集

九

餘暇簿書不遣防清狂眼前突兀非舊屋興頽舉
廢無時荒詩詞下筆妙一世和者傑手皆蘇王至
今文士勝遊集春秋排日提壺觴四方過客偶信
宿好名亦必停游韉雄樓傑閣滿天地斯堂不與
衡低昂山平水遠妙蘊藉略如歐老行文章南徐
北固隔鄉縣憑君眼力收江光夷陵画舫更何所
倚欄懷古山風涼

長于秋柳四絕句

金線曾看拂水痕無端冷落映孤村六朝寺寺樓

堪倚敗葉愁人亂打門

莫愁湖畔一絲絲
盪槩何堪問舊枝
蟬去夕陽鴉
去月白蘋風送雁來時

十四樓頭金粉空
昔時團扇委西風
等閒草木無
情思憔悴天寒賦惱公

不用金城嘆短條
亭邊送客省勞勞
但來王謝堂
前燕依舊春風似剪刀

夢中得花殘風韞春
歸疾竹礙簾旌月上遲
之句枕上足成一律

江峰集

十

黯黯孤檠照薄帷
枕間強憶夢回時
花殘風韞春
歸疾竹礙簾旌月上遲
不盡愁懷難遣處
無多酒力易醒時
疎鐘又起寒烟外
錯莫年華夜半知

三叔父偕喬元溪妹
聳懷舒二弟江村看花
余不果往悵然有作

漁林蟹斲記分明
重入烟村路未生
蠟屐也思新
艸色病醒偏負曉
鶯聲城邊水繞春
來碧江上山
橫雨後清不獨妬花
兼妬伴此行步步是詩情

席上有贈

紅牙小版領天斜。定子當筵倚暮霞。初試新番數
般曲。流鶯啼出海棠花。

羽衣一曲舞霓裳。長袖風迴四座香。賴是生來天
寶後。不然狂煞李三郎。

分明漢殿女珊瑚。欲喚纏頭怕錦粗。我若長門能
賣賦。不辭論斗換明珠。

紅橋新漲歌

紅橋一灣如溝洫。細流但可浴鷓鴣。平日城隅集
小船。舳舻擊篙摩愁偏。及此間無地張水嬉。聊依野

江峰集

十一

岸尋酒旗。行行差足快人意。園亭接翅花交枝。園
窮路轉略空濶。金線垂楊兩邊合。小橋倒影若垂
虹。惟媿溪光說蒼雪。轟雷昨夜來江門。漏天白雨
驚翻盆。遊人看水不待曉。綠萍漂過田家村。酒船
入夏常低價。數錢今過河間妣。小篷只受兩三人。
三百銅錢留不下。清尊羽扇沿菰蒲。張燈夜飲添
紅酥。憑欄我醉夢魂遠。茫茫萬頃浮江湖。

桐

桐葉悲先落。春來可更生。一年依老屋。昨夜有秋

聲風急知天意霜多見物情蕭蕭明月夜枯影上
窗橫

和熊繼亭秋思二首

秋來相顧竟如何對酒誰當一曲歌深巷閉門時
令過小園經雨樹陰多風來西面愁芳芷人到中
年怨碧蘿三十六陂湖水好臨川爭柰逝春波
碧天無際思無涯今古無端入怨嗟黃葉騷人愁
蟋蟀紅燈老妓泣琵琶涼風蕭瑟初來雁細雨廉
纖晚作花我亦秋聲賦中客不徒歐九鬢髮髵

江峰集

十一

和天闕乞瑤草詩二十二章

授經圮

早授一卷書晚輕千戶封胡不從黃石而乃從赤
松

石田

屑玉以爲糧身輕當却穀離離瑤草生安用羨梁
肉

紅樹徑

白雲停層岡紅樹耀幽徑天風習習來深林落晴

磬

登微橋

駕言躡長虹飛空生羽翼舉頭觸天星垂手拾海

石

先春坪

白鹿擾蒼坪梅花落如雨和雪嚼殘英羅浮在肺

腑

芙蓉澗

碧澗流潺潺不栽桃與李洞口白雲深芙蓉隔秋

江峰集

三

水

菊坡

種菊春已苗南坡欲盈畝落英流甘谷分飲一村

壽

景靈洞天

披雲得洞天仙人此焉宅流泉自激撞乍見乳珠

滴

猿鹿渡

日與木石居還與猿鹿遊久狎不我避共飲溪上

流

洗藥潭

土肪闕靈秀
瑶艸發光澤
竹杖荷筠籃
寒潭烟水白

泊雲館

攬之不可收
搏之不可結
山館寂無人
風來動虛白

桂嶺

丹桂七十株
青腰三千女
飛雞遠銜來
落我尊中

江峰集

十四

醕

駐鶴亭

蒼蒼巖間月
送影孤亭中
獨有千年鶴
來栖偃蓋松

淘丹渚

采藥雲收時
淘丹水流處
靈滓遺澄潭
潛魚忽飛去

掃壇柏

翠柏蟠虬枝
何年古壇下
浮埃自不留
月明清影

寫

巖上住

躋險千仞餘上有香茅宇仙人乘紫烟時來復時去

藏顛閣

微顛安能藏顛極安所底但得顛中趣不問張與米

斷彼巖

斷妄以存微避囂以守寂孤峰夕照紅餘此一寸

江峰集

五

碧

仙靈度

神向雲邊度形從石罅藏至今仙閣上丹粟餘幽

香

梯雲磴

懸崖出鳥道陟險凌其顛舉手絕攀緣御風尋列

仙

瑤壙

昔時所埋物幽邃不可測深宵發奇光瑤函兼玉

煉丹臺

煉彼玉石英
寅申火微爍
丹成笑許遨
何爲化雙鶴

書外祖蛟門先生百尺梧桐閣詩集後

揚州以詩鳴時賢
蓋可數朝野
格盡高開先
吾外祖前此豈無人
未許風騷主公也
得之天更以學術輔會粹
去陳言清新見奇古
詩派久荒蕪
超超羞噲伍
張陳變唐初
厥功不下禹
披髮下大荒
撫

卷感風雨

江峰集

六

折菊分插瓶罍層疊位置得三絕句

秋入簾櫳引興賒
瞻瓶磁斗任欹斜
汲將蜀井潛通水分插
陶家自采花

好枝芬馥當書幌
細蕊離披近筆牀
六曲屏風花數疊
人間何處五更霜

香散清齋夜半時
紅燈低照影參差
一杯孤坐閒相對
冷落心情獨爾知

彈琴

琴道亦寂寞那及琵琶箏曲終一奏雅但覺移我
情市朝難盡遠喧動愁營營息心使歸靜不必皆
成聲古人去已久懷抱傳分明陶公且無經安用
曲調名輕風在北戶好月來南榮拂拭花下石布
置綠綺橫澄懷一再鼓裊裊茶烟生邈然儼懷葛
舉首天宇清

余葭白招同李曹村小集因樹樓

門清如水酒如油客到吾曹不待留人得公榮皆
可飲菊先九日已成秋尊前北海談瑤島天外西

江峰集

七

山入畫樓夜半月沉僮僕笑風簾還約下雙鉤

偶作畫

作畫不必畫但寫胸中詩詩意無盡藏游戲偶出
之有人好此者米顛虎頭癡天機遠人事乃能發
清奇吾徒苦檢束放曠敢若斯去古自較遠聊與
俗情辭小窗花艸麗婀娜因風吹忘言正得意點
染烟兩滋在畫爲小品逸氣亦在茲誰知造物意
生趣惟吾私徐黃未暇論用志手輒隨茫然無師
法吾師絕妙詞

水仙花

種自拘樓國依稀洛浦神江皋初解佩羅襪未侵
塵簾下留香靜燈斜弄影新消寒數晨夕此是素
心人

將之都門留別諸父諸弟

上古重去鄉守道安行藏中古德衰薄始言志四
方一成遂不變容易馳康莊科名何與人厲階由
漢唐到今紛進取失否得乃臧先人得上第早世
家所傷諸父我勸勉諸弟我勸勤榮枯有天定欲

江峰集

六

飛猶迴翔我母告祖母扶攜下高堂攻車擇吉日
毅然理行裝硯田父所授躊躇愁蕪荒敢安井底
蛙姑妄排天閭直北三千里疲茶褰衣裳入門心
宛轉出門氣慨慷吾家敦孝友子弟粲成行一家
如一身百事毋分張燕山望渺渺邗水別湯湯忍
淚開笑口道路甘風霜

淮上懷古四首

貴賤皆再食一飯哀王孫飢驅想當日未知叩誰
門時來動君相餓夫登壇尊國士得性命漂母天

地恩滅項若摧朽興劉此其根薦賢蒙上賞何況
關公存若築懷清臺可使薄夫敦千金何足報至
今祀雞豚

處世忌太直汲黯幸全終淮陽雖可薄其郡猶繁
雄漢武命臥治慰勉恩禮隆王臣苟蹇蹇亦可信
匪躬人但直如矢無事曲如弓子孫多九列餘烈
無終窮平津巧阿世張湯懷詐忠功名亦易盡淮
水餘清風

漢文好黃老漢景好刑名詞賦開武帝一時衆雋

江峰集

九

生枚皋號敏捷淮海鍾聰明工巧較犬子何必分
重輕後世工無益黃金須滿籬至今鄉里地多藏
多錚錚作賦試擲地誰知金石聲望古但浮慕空
表舊閭閻

苟安笑南宋淮陰爲邊陲有時不設備老将恒垂
之忠勤賴斬王夫婦袍鼓隨辛苦共士卒僅免宗
社隳羣帥納兵柄危疑時可知晚節隱湖上不使
將吏窺功高貴至慎武穆良可悲四郊今無壘衽
席懷過師

渡黃河

風高野濶天蒼蒼草平隄軟沙茫茫百川時至聲
湯湯白日欲下中流黃黃流十里高中央公無渡
河戒舠艤穹龜巨魚出龍堂險阻不敵書生狂滄
海可蹈思褰裳蓬萊清淺猶栽桑丈夫有志須飛
揚水激三千里何妨擊楫徑渡驚扁郎兩岸時與
船低昂偶思槎客犯銀潢石榴花放牛斗旁濯纓
未暇歌滄浪

紅花埠一帶栗林

江峰集

二

紅花埠前紅日西倦客欲睡饑馬嘶停車小歇藉
芳草遠樹乍見青迷迷欠伸叱馭首前路一色漸
辨枝柯齊徠新甫松柏遠此地種栗排町畦地
平如掌望無極下走白犬兼黃雞東南有畝利不
及抵羊萬角牛千蹄我過尚惜節令早但見風葉
時高低秋天結實聞更好樹下婦子相攀提且掃
且剝等收穫餘遺猶許徠揉攜人生當著幾緡屐
坐棄鄉樹行山蹊

沂水

沂水曲曲清且漣倒浸千里晴雲天古人已去雀
兒浴客子飲馬聊沿綠

浴乎沂昌黎作沿乎沂余兩用之

一州斗

大城郭冷居民織繭山桑前馬頭喚客尺度足客
意不暇惟臨淵十漿五漿野店接長亭短亭山程
聯眼明此水換塵土猶惜易涸爲山泉江南水鄉
畢竟好百丈如織延河牽沙明波淨雖不及容得
米家書畫船

蒙茶歌

蒙山山下多青霞蒙山山上都種茶石泉新火雨

江陰集

三

前後柳筐筠籠來山家沿村一路飲柳葉入口不
下人咨嗟中途得此喜意外大笑如見優曇花磚
鑪瓦鈿咄嗟辦林間燒葉兼槎枒石炭未用損標
格銅瓶旋汲求井華蝦鬚蟹眼第二沸火候正到
投青芽茗柯未信有實理救渴始悟過浮瓜人生
口腹苦無定宴居事事求豪奢膏粱厭飫飽欲死
武夷粟粒猶揄擲

揄揄倒用本廬全

此豈至美已快意大

肉硬餅澆义了叩門乞漿又明日且秣吾馬膏吾

車

羊流店曉發

候館齊開白板扉羊公遺蹟已全非春光漸老夢
千里殘月未歸山四圍懷古尋碑文字少送人延
路艸痕稀蕭涼猶有風流在楊柳青青上客衣

馬陵道中

勞勞喚客累荒雞客倦無聊路欲迷長日欹斜芳
草晚短亭依傍遠天低柳條經雨黃初嫩麥隴翻
風綠漸齊笑煞蹇驢窮費島月明山店馬陵西

望嶽

江峰集

三

驅車入山口所歷愁崎嶇逢迎有列岫意態無差
殊僕夫不好事問名但睢盱奇峰忽當面萬狀相
撐扶心知此泰岱大方果無隅屹如陣雲立秀如
青蓮數一洗培塿曾使我卑寰區方鎮辨齊魯典
禮思唐虞七十有二君玉帛渺荒蕪泗上十二侯
干戈亦以無秦漢不足論懷古立斯須斯須空延
佇安得拄杖扶飛步上孱顏夜半看日烏低頭眺
東海一氣青模糊吳門驗顏孔曠覽巨細俱嗟哉
此空谷誰爲繫白駒馭者苦促迫匆匆即前途青

眼在松柏白日垂桑榆勞人歌草草山靈毋盧胡

漢柏行

山祠日午寒無光森森松檜陰空廊中有翠柏更
挺秀欲凌泰岱摩穹蒼炎漢至今閱千載歷歷兵
火無摧戕神依鬼護自長久烏飛兔走仍昂藏香
葉離披挾風雨老幹倔強排冰霜荒烟野霧競栖
託時發清籟吹笙簧客來坐臥不忍去摩挲百過
吟哦長昭烈闕宮孔明廟蜀中僻遠誰表彰當時
過者有杜老遂使傳後同樓桑眼前高格對此樹
我才薄劣慚蒼茫

江峰集

三

德州過田少司寇山蘊先生墓道

詩教一自開宣尼治詩漢有魯與齊山東歷世尚
風雅談宗說派分町畦白雪樓高峙明代前後七
子相挽提三唐音調略仿佛四始門逕殊嫌低我
朝名手王司寇山海會盟疑航梯田公一時號瑜
亮同雖不党貳不攜新聲鼓吹兩倡導盡洗村笛
清邊輦論功壇坫亦時傑比擬畫品如黃倪關荆
顧陸更何許兩公不死應能躋後學服膺過墓下

媿無絮酒兼炙雞
徘徊長揖向華表
深林落日空
悽迷

趙北口

燕南趙北際不合
大如礪天下今一家
咽喉控四裔
一隄貫中央
左右水溶瀉
行行苦塵襟
清波幸迢遞
柳幄何深深
隱護小埤垵
野逸見清嚴
荒陂有官制
漢武昆明池
習流到今世
我朝行水圍
甲士騁利濟
春水泛桃花
秋潮足魴鰕
樹羽冰泮來
網罟殿最計
閒時風蕭蕭
有鶉窺笏
敞旅舍魚鱸

江峯集

十四

多芳鮮薄薑桂
努力但加餐
卓午聊小憇
水風解留人
新蟬吹擘擘

涿州懷古二首

炎劉火德長雲仍
尚建國桓桓大耳兒
未可嗤老革
高光四百年唾手委國賊
撫髀嘆肉生英雄有本色
混一雖未成三分存社稷
生兒若克肖大業安可測
想當初起時販屨氣低抑
種菜或閉門智勇亦深匿
艱哉重艱哉寔為萬夫特
童童羽葆桑使我長相憶

有龍雲則從有虎斯有風蕭曹佐劉季率起沛與
豐昭烈得將相葛侯起隆中亦有超羣髯翩翩來
河東若論起鄉里厥先桓侯功椎牛結死士羣材
乃從公入蜀侯獨鎮君相多臨戎當關一夫力孤
羸守深叢史書稱禮士不獨英姿雄一體祀粉社
雞黍來村翁

琉璃河

鷗鷺集沙渚車馬驅石梁人物異動靜愧此清流
長遙遙見蒲柳外有十尺檣小篷曬紅網月下思

江峰集

五

鳴榔昔者石湖老于此看鴛鴦見石湖絕句詩渺矣不復
見懷抱空蒼茫

灰洞歌

京塵尚未見軟紅素衣化緇想像中良鄉灰洞三
十里已如細雨來空濛灰洞非洞類夾巷車馬碾
裂無時窮狂塵不定易埋沒白馬成鐵兒成翁吾
儒一世釋一劫道家總謂灰塵同安能遠訪蓬萊
宮清淨萬頃玻璃風

良鄉感事

天意厭明德，沴氣出魏璫。杜郵賜之死，傳聞于此鄉。
有明中涓禍，王劉已披猖。後來乃居上，盡使正士殃。
正士邦家幹，殄瘁因人凶。及乎誅既死，不救國脈傷。
嗚呼明祖制，灑掃職所當。官不過五品，貽謀非不臧。
用事始永樂，其端遂開張。積漸至墟社，何如大為防。
周禮奄寺輩，冢宰總紀綱。史記趙高傳，亦著法戒長。
賢者寧有幾，漢代惟呂強。鑿之宜鑿之，駟馬亦不祥。

駟馬用五代史中語

抵都

江峯集

五

昔者韓昌黎，苦招揚之采。作詩喻柏馬，相期遊皇州。
森森浩烟海，多士如萍浮。安能保珊瑚，定有鐵網收。
窮年誦經史，牖下老亦羞。石田聊耕鑿，矯首黃雲秋。

序

予承乏來吳下道經廣陵與同年程泚江相見驪
然道故外即問其所爲詩而泚江刻分藜集適成
分藜集者泚江儆直時作予雖未珥筆追隨而公
退之暇未嘗不相過過未嘗不論詩甚相得也無
何泚江南歸相別十餘年予奉

命校士山左得其所寄詩一二篇慨然遠想冀旦
暮遇之今又讀其哀然成卷者若干首其出入承
明鞭絲帽影間作推敲狀猶宛然在目也顧當時

分藜集序

所作甚多乃芟汰不及其半蓋其於詩持論極嚴
凡一言一字之不自慊者不惜去之而今之所存
遂卓然成一家矣泚江賦性閒遠超然塵瑩之外
聞其築篠園西郊有修竹十畝槿籬茅屋如野人
居惜予簿書方迫息憊不及游而泚江春秋佳時
攜筆墨吟咏其間清陰在硯上輕風浙浙與歌聲
互答其所成就更何如耶予行矣吳下去廣陵一
衣帶水繼此有刻成者將以寄予元白詩筒於今
且復見之宜豐年第漆紹文書於邗江舟次

分藜集

江都 程夢星 午橋

上座師武進趙大司農

明月出九幽光燭十二樓高下不相及潛波動蒼
蚪丈夫重顯著君子惟冥搜文章非小技即聲心
可求鳳皇覽德輝黃鳥集丹邱同聲偶相應羽毛
蒙見收見收不足喜所喜良有由上以事堯舜下
以從伊周平居則古昔不敢安常儔青氈無故物
一第懷弓裘父書恐失墜師門幸從遊清德范羣
類淘汰無濁流榮利有天賦修名惟人謀臭味近
德馨永矢慎薰蕕

到館

引試列鷓行相將入玉堂地清慙館閣官冷愛文
章劉井茶烟白柯亭花影長前賢付風味不獨荷

恩光

劉井柯亭詳朱竹
垞先生日下舊聞

奉

命直武英殿修書

聖朝清晏肩陶唐潤色駿業維文章二酉四庫積

充棟蘭臺虎觀森開張國家不少劉子政小臣亦
分青藜光孤生讀書苦不足公田正救私田荒餐
錢况頌大官膳紙筆同給尚書郎作君作師兼惠
養職思敬業逢時康惟愁半豹致客誚難以寸管
窺穹蒼七略未起王儉例三篋那補河東亡曉鶯
同入暮鴉散官花過雨沾衣香

安溪相公邸第對奕

昔者謝太傅國事獨仔肩對客若無事恒在楸枰
前功名本鎮靜捷書泚水旋大雅久不作心法惟

分藜集

二

公傳海濱法鄒魯相業尤大全致

君過三五靜退如安禪門館二三子講學何聯翩

走也愧薄殖末座廁賓筵蘭芬幸奕葉

先水部辛未成進士

出公門下拂拭非世緣餘閒偶較奕此豈足留連即事

有至理荒棘開情田其法出陰符其數歸先天藝
成亦本道所爭一著先範圍指天地再拜謝陶甄

題家滌存画木芙蓉遺墨

萬朶輕紅障晚汀權歌聲裡月微明秋烟冷落知
誰主惟有仙人石曼卿

種竹

長安擔頭春過雨，
刷修竹百錢買數竿。
倩君媚幽獨，
廣庭羅清陰。
預計避炎燠，
微風過高枝。
瑟瑟鳴寒玉，
客來拄杖看。
袁王兩高躅，
勞勞灌溉心。
借此暫醫俗，
手把種樹書。
日晚鬢眉綠。

咏鴛鴦菊

秋老西皇欲弄奇，
東籬幻出兩三枝。
屏窺玉靨勻妝後，
袖掩金鈿半面時。
異本開齊分紫白，
佳名難遣是離披。
新篘酒熟還堪把，
却笑陶公未入詩。

分藜集

題吳竹村種花圃

三

長紅小白露芽香，
白木長鏡觸手忙。
一自月中曾斫桂，
至今花影戀吳剛。

除地不嫌分日徙，
移栽欲作四時看。
鶴飛莫問三珠樹，
自唱農家七寶丹。

烟雨元功阿堵中，
偶然辦作灌園翁。
不須老圃來相伴，
黃鵠高于五尺童。

一種花開一舉杯，
五風十雨錦城堆。
閒居賦就多情思，
要向河陽縣裏栽。

沈厚餘墜馬傷臂次顧俠君韻起之

偶然快意欲追風一笑遊韉脫手中自是乘船同
賀老不知折臂作羊公尋花未必非天忌把酒何
時與客同瘦盡東陽休悵望高眠八詠正應工

九月八日怡園小集和方石川前輩韻

木落霜風客思清茱萸灣裏舊江城鶴盤遠勢方
千意不待重陽載酒行

孟韓聯句說城南花下題襟趁半酣明日茱萸應
有賜且將秋水濯纓簪

分藜集

四

賦得隣家酒初熟

三升良醞不應虛比舍糟牀灑玉蛆野老豈嫌爭

席坐高人尤喜結隣居

杜牧詩高人
以酒為忙事

阮公醉卧初

無礙畢老偷嘗亦太疎聞道冬缸香色好隔籬呼

取意何如

小月詩

衣袖香生月殿人裝成百寶是前身如鈎齊愛三
更夜未要銀盤露滿輪

紅兒比盡煞粗材爭似奩邊一線開當面珠簾須

捲却清光有意入懷來

苦雨

積雨池塘柳耳生濃雲猶自壓層城街泥沒髀雙
扉掩羸得松濤石鼎聲

南郊恭紀十二韻

一陽調樂律萬乘宿齋宮北極神光麗南郊祀典
隆鴻禧從日至

聖敬與天通法駕清宵裏香輿曉色中燔柴黃道
吉奠璧紫壇崇劍佩嚴仙仗簫韶達上聰舜禋千

分纂集

五

載繼堯曆億年同享德知時泰承庥驗歲豐冰花
成瑞彩梅萼動融風氣自葭灰出人添線縷功慶
雲彌宇宙長晷過簾櫳四海昇平象

君恩洽化工

題王翦林趨風圖

吾友於爲文浴鐵撼山嶽孫郎帳下兒氣奪看橫
槩西風動金沙無端憶飛駿獵獵兩袖風豈趨兔
樸渥南雲有歸思不問意可覺新馬盤蟻封家事
不外學天壤此王郎較古殊卓犖願君迴金鞭浮

沈信方朔

乞王麓臺先生畫山水

馬蹄踏鐵車，輾轉紅塵烏帽日。奔逐長安風土苦，
低頭故國溪山難到目。一官那得及向平，無已聊
學宗少文望梅止渴。且自賺卧遊圖畫窮，斜曛鷺
溪東。絹白如雪好手難遇出，復輟山川面目須偉
人。當前幸有王摩詰，吳中舊手稱二王。廉州安能
望太常風流不墜得，家法公曾落筆中。書堂解衣
礪礪久供奉，一水一石今時重。天下至寶宜自矜，
亦有成言天下共。湖州厭苦罵鞵材，願公耐事毋
喧。聒耳目近玩不敢論，要使江湖魏闕來。

同館集天壇看牡丹

花兒市上賣花翁，一擔束縛數十叢。草木無言畏
姍笑，苦遭人厄成。天窮牡丹最貴賣，最早新正未
破，以火攻瓦盆局趣類。棘下樂土惟有天壇中天
壇清闕地鏡淨，道士食祿多閒工栽培。灌溉待時
節，杜門自賞人難同。吾曹好事幸一諾，薄裘快馬
衝東風。雕闌七寶雖未有青油布幕遮，晴空相逢

大笑爲花賀凡百遭遇須時通偏捉有酒乃夙具
飭餼肴核隨家僮殿廷日飽大官饌酒杯不設無
花紅及時行樂古所訓催歸有鳥聲恩恩黃蜂紫
蝶甚無賴花房夜夜留齋宮

七夕

門掩蘿陰一徑斜喧陳瓜果聽隣家倚欄斗覺新
秋節笑指牽牛晚放花

喜晴

積雨苦冥濛黑雲低欲墜堅坐意亦疲枕手但昏
睡大塊噓長空琴琴生晚吹斜日射林巒嵐氣變
蒼翠高樓發嘯歌喜與清景會片月溼團光宵映
入深邃暗螢度花叢宿鳥落槐穗萬籟欲成秋微
涼先衣袂對酒忘更闌頽然不辭醉

月夜聞笛

倚樓獨酌不成醺一笛多情靜夜聞萬頃太湖思
喚渡月明吹破洞庭雲

湯院長約同館分俸購書籍欣然有作

古言酒猶兵不用亦必備此理可喻書有力且勤

置釋氏藏有三官家庫則四所以柱下風代燼及
中祕前賢于私家尚作藏書記觀其鄭重言聚散
有軒輊館閣最深嚴飄零嘆金匱善事求良工得
不先利器文運今中天休明合鼓吹廩祿若虛糜
何殊以俳優新進竊有懷前輩留意箕歛夫誰
辭賢于文酒費南面擁百城何時眼中遂有志事
竟成願公矢勿貳

御賜安溪相國松花江石雙硯歌

松花江水鴨頭綠碧色雲根同玉璞

分齋集

八

龍興地脉有淵源天遣良材此間伏陶泓自昔推
文房適用不必拘圓方端溪歛石後居上櫝藏錦
裹同琳瑯犀紋彪紋未易得翡翠鴿鵲尤稱良豈
知我朝出異品東方寶氣開扶桑尚方多巧匠硯
務呈官樣捧將黃閣畫簾前來自紫皇香案上延
平自是大儒宗深之始稱微宰相一雙特賜非尋
常要歌喜起賡時康公餘點筆勘經史隄糜古漆
凝精光古來文士遭際受賚或有此若較今時君
臣道合難頡頏君不見我公治平天下事如硯四

角周中央小子作詩侍硯北願公二十四考常在
中書堂

自鳴鐘

奠虞無殊制蒲牢有定名如何懸閨寂輒忽響噌
吰內府工官備遐方巧匠呈似聆金作止免覺水
虧盈不爽陰陽候常依斷續更三商同夕漏百刻
逮天明乍歇微風靜初鳴過鳥驚機絨恒自祕振
觸本忘情餘韻飄虛室清音在禁城景陽徒考擊
無射漫敲鏗欲與簫韶配應隨萸莢榮

分教集

九

聖朝方協律長奏泰階平

送懷舒鈞奏兩弟歸里

菜萸滿把不勝簪兄弟天涯任醉吟千里塵踪長
枕樂三年別夢短檠心卞和王璞新知少張翰尊
絲舊思深歸到蜀岡回首望有人愁絕二毛侵

立春

時光客裏易消磨臘盡春來雪下莎預擬新年開
笑口不知何處最春多

一夜東風律轉新寒銷今夜酒鱗鱗如何小歲辛

盤會半是離筵惜別人

時同館請假者凡十餘人

除夕

滿庭松火逼年殘吟倚梅花向晚寒門外雪車愁
輾轆燈前花燼憶團圍市朝又見桃符換歲月空
從柏酒看暈碧裁紅須漸次先教點檢鬪春盤

題家高亭持竿圖

閒裏持竿坐石苔手勞目倦莫輕回一絲直下龍
門鉤須掣金濤赤鱗來

人日劉艾堂方石川前輩蔣淑瞻館丈楊漚

分藜集

十

南舒子展同年小集玉舟花屋分韻

入朝何必說朝霞小集詩家與畫家試驗東風殘
臘甕略嘗生菜早春芽令窮經史聊除俗時送冰
霜漸有花獨惜能書王大令海邊騎馬踏寒沙

王弱

林往靜海不至

上巳集潘穎少寓齋看海棠

石林一徑隱春烟西府花開費酒錢折簡當頭題
上巳麗人三月到尊前

花木平泉減舊栽雙株猶作女兒腮風流標格含

才思不爲君章不肯開

寓爲高陽李相公舊邸

防風防雨得春晴論客惟余不算生記得壬辰曾

結夏較遲惟見綠陰成

余亦曾寓其時過春矣

未煩君勸盡金卮忽漫當筵有所思猶惜東風太

催促不曾看得半開時

檐前燒燭照花神入夜紅妝分外新若使黃昏暗

相對更憐魂影李夫人

塵襟吟賞便應仙酌斗惟愁過十千君辦此花誰

辦酒不妨同作海棠顛

分黎集

士

豐臺王文靖公園看芍藥

豐臺土色皆羅綺駭綠紛紅亂花蕊名園相倚到

春深掃空風雨凡桃李芍藥無端又一時花農盡

荷金鴉背就中繁麗數王園一色相公袍上紫

皆紫不問他色相公身世輔太平曾傳休沐花光裏綠野

堂前舊井榦轆轤聲在遊人耳園丁澆灌兩手勤

客子行吟閒徙倚回思鐘鼓樂清時此地此花凡

四紀吾曹祀命不論官亦復愛花入骨髓走馬朝

來帶露看繁枝不入花兒市

豐臺諸圃率以折枝入市遊人至者了無

可觀惟王園園丁謹奉約束不賣惜哉種紫不種白淡掃蛾眉想

妍美書生眼角笑寒酸歸對空庭月如水

封氏園黃刺梅歌

刺梅紫者名玫瑰風韻不及黃刺梅清明雨過塵
土淨城南小圃周遭開圃中臥松老得意橫放直
幹驕摧頽蒼顏白甲邀客賞青眼今日為花迴鶯
兒黃似新釀酒風吹顏色添金杯深叢鳥過枝裊
裊醉眼錯莫流鶯猜秋天蜀葵固淡蕩檀心猶覺
同凡材道家裝束合相讓厭禳病起黃純裁牆東
道院鶴一色松花染背方飛來

分纂集

三

送王箴六歸太倉

索米長安攬客思人人空說憶蓴絲收羅風月歸
君手好是青山獨往時

五湖烟水自漫漫半幅輕帆下急湍寄語江南諸

酒伴莫言容易是拋官

謂秦藥師杜紫綸周大有

次韻方扶南荅巢大司寇致粟

米貴長安踏破鞋相逢顧况恐朝諧那知春草驚
人向傾國來吟獨坐齋

扶南入京杜門不出華亭王大司農題其寓居為獨

齋坐

雲子分頰自有莘不關平素後堂賓尚書枉駕逢

高卧垂死頭顱重傲人扶南落落寡合司寇初訪
堅以病辭司寇甚重之

扶南招同汪武曹文升何屺瞻張匠門方石

川諸前輩徐亮直王若林舒子展諸同年集

飲寓齋因疊前韻

春雨泥深沒笋鞋主人招客縱談諧蛤蜊已遣門

生議却酒何言廿九齋扶南性好佛又
不喜赴人飲

觴豆交陳莘復莘賣文高價費留賓朝天三斗吾

多齋集

圭

曹少羨爾長門作賦人

退直偶成次滄洲先生韻

四庫籤題校直盧承恩未敢謝才疎頻繙不使蟲

生蟲博引何嫌獺祭魚歛段晚天長借馬短轅斜

日自驅車歸時一笑平生快奚止三冬萬卷餘

石槽送

駕熱河避暑

六月斯徂暑首夏方清和離宮遠法古九成壓山

阿

皇情契長養樹羽臨青莎風伯躬前驅萬騎無塵
過道邊有樾蔭延佇聞農歌宿麥及時熟剡剡臨
清波吾曹絆京洛時序空消磨江南水田綠處處
香稻多黃梅細雨足安得眊庭柯在公嘆靡盬即
景聊婆娑

冰供歌

佛修淨土居清涼陽燄渴鹿世所傷朔方高寒語
不驗京城白汗時翻漿熱如酷吏小杜窘蒸比深
甌昌黎狂僦居庫隘無廣厦炎官火傘愁煌煌吳

分藜集

苗

淞半江果可翦滌煩直欲傾三湘日在北陸幸早
辦伐冰官窖兼私藏市兒銅鉞打鐵鉞

語出南史 聲聲

喚客來牆匡三百青銅買片段花斲紅玉堆空堂

綉簾晝下簷鐸靜坐使八席臨滄浪東坡昔有怪

石供有用無用分低昂擾擾正作蒼蠅賦一笑行

觸寶瑟僵

借用漢書語

門外襜褕者誰子熱中自取非

天殃夏蟲不足語此事野狐曾聽疑有妨炙手可
熱任世好冷淡生活我所長

納涼得炎字

月光不受暑燦若新磨鎌展簾那暇睡涼影巡風
檐銀河正耿耿牛女遙相瞻愛此夜景清天宇澄
冰奩漏靜坐忘倦倏忽移更籤把酒不復辭何異
當秋蟾燈火未須設飛蛾免趨炎

立秋夜王翦林沈凡民見過值余方撫琴為
一 彈梧葉舞秋風操

天高雲白凝不流高梧作意鳴清秋閒門一徑土
花碧主人抱琴風颼颼空堂宴坐胡牀上排闥來
賓意疎放相思正待折簡招不速能來更懽賞玉

分藜集

五

蛆浮動花筩開呼僮淨洗黃金壘為君牀頭傾酒
母漏高莫管金吾催風來露氣淨塵陌銀漢當空
挂斜白娛賓慙媿無管絃摩挲七絃按雙膝清商
拂拂秋風生林木振響栖烏驚曲終斂手主客靜
唧唧四壁寒蟲鳴君不見羲和鞭日如走馬落葉
已滿故山下年年歸夢空迢迢不來取醉胡為者

七月七日祖家園水榭作

秋懷入良辰勝地結遐想策杖將獨遊隨意得酒
黨問訊城西偏秋水愜幽賞積雨淨塵氛半篙淥

新長天行尚餘暑人意已蕭爽疎柳帶高蟬風來
發清響水禽浮隻雙蕩花艇三兩何必茗甞間詩
情滿菰蔣咄哉南阮禪子子標竿上蠻府郝叅軍
曝腹空悵快吾徒事微名局促多鞅掌此生著油
屐知復計幾緡安能借溪南架屋面弘敞

迎鑾曲

軟紅日日踏春明誰復從容郭外行聞道
六龍迴北極千官齊出鳳皇城

九秋風色透朝衫道上巾車似掩關向日有心偏
耐冷好乘霜曉看西山

分藜集

去

飄蕭天外有丹楓盡染猩猩一色紅映帶遠山青
未了分明扈蹕錦屏風

射獵長楊又過秋尚衣新進紫貂裘官中共熱沉
香火一朵紅雲十二樓

寒烟作雨曉霏霏霖霖無聲溼近畿似識
君王勤問歲要添秋未晚菘肥

紫氣東來秋似春鵝行齊拜屬車塵列仙漫問新

班次爾雅蟲魚蟣蝨臣

時方分修
蟲魚諸書

湯山晚歸

古木蒼烟外憑高縱目齊城連大漠北山抱密雲
西空磧風驚雁荒村哨出麝不因湯沐衆暮景亦
淒淒

同人各畜盆菊迭爲宴集作歌

越鳥不得巢南枝慰意略有花史知春風芍藥曾
競賞旣罌惟惜無多時大邑燒薨辦盆盎秋來早
與老圃期菊花論擔排日買有賣不顧官錢支同
人好事亦如我紛紛爭致連階墀霜天雁過秋瑟

分藜集

七

瑟簾櫳遮護兼書帷銀臺門外小三昧下直上馬
聯鑣馳潞河落帆酒船到朝衣且典供尊彝初筵
經史徵雅令酒半間雜歌聲詩鬢鬢鬢鬢鬢鬢鬢
醉眼紅碧評高卑茫茫天地此身世西堂蟋蟀何
傷悲陶公棄官固過我得意亦只窺東籬醉語自
喜聊自解菊花淡蕩恐見嗤人生有味秋風裏畢
竟尊鱸下釣絲

安溪相公座上食荔枝有作

閩海論包貢炎天風露香側生常纂纂朱實正煌

煌品著三都賦名傳十八娘茜紅羅作壳瑩白玉
為艷漢代交州遠唐時蜀道長郵來雖足貴較去
此殊常昔見端明譜今逢綠野堂分從調鼎手徧
許及門嘗馬乳何堪並來禽未敢望啖思三百顆
樹憶一千章最好楓亭驛低垂蠟粉牆熟應防石
背石背蝕荔蟲見閩小紀采盡挈筠筐聲價魁南紀梯航入
帝鄉蟠根近仙李自合醉瓊漿

滄洲先生方石川張雪汀兩前輩偶過小飲

今日適無事不必隔宿招入門忘主客使我鄙吝

分黎集

六

消古時大雅久不作吾黨風趣須蕭騷官事日役
役兩丸晨夕跳及時把臂好何況當良宵纖纖兩
頭一鉤月清尊倒影如秋潮馬蹄門外忙特特蟲
聲庭際聞啜啜上戶書上考主人容三蕉簷牙舉
首見羅網無使拘束同蠨蛸參橫斗轉供大笑夜
深不必問麗譙詰朝懷鉛握槩入殿角涎流麴車
又過金鰲橋

過工部愴懷 先水部公

吾家侍御後族繁門祚衰一二代父行聊接裘與

箕吾翁奮先登宗鄙期臯夔續學本遠大論年尤
可爲服官得水部人謂風雅宜何遜張籍後正要
絕妙詞君子凜官守不敢專聲詩清勤督府史恪
慎偕曹司大僚起敬畏有事恒見推例得巡道路
六街頌清規周禮冬官缺考工僅工師川師屬司
馬今惟司空咨吾翁雖好古憲典則從時靖共在
即事不受豪猾欺聲名日以著心力日以疲回頭
憶大母得疾兼孝思不謀遽請告一官棄如遺東
門列祖帳僉問重來期嗚呼遺世意詎料能前知

分藜集

九

到家拜母喜忽忽遺孤悲孤久困場屋迄今承鉉
基長松不可見慙無清風吹銜淚過舊解舊吏猶
有之謂我翁是似勗我翁是儀我承館閣後老輩
聯丹墀就中父師友有崇官無卑天胡不憇遺箕
尾等閒騎至令老成惜百蘊未一施藐孤感明發
竊祿徒妻其瀧岡表新阡未必能若斯不仕固無
義仕亦資涕洟祿入不逮養歸哉懷茅茨

次韻李牟山前輩見午門內調鷹

何處來名鷹軒然蒼玉色勁翮摩秋霄颯爽不可

即羽林好身手網羅到上國臂韝日夜調搏攫試
筋力金爪忽怒翻星眸更閃側下視百鳥羣掠地
已遭踏平原枯草間弱肉恣所食自惟鷲猛姿假
彼吞噬職豈知受羈紲動止有徽纆飽飛或可欣
饑附亦良亟胡不事來儀安閑戢毛翼鸞隼理則
殊此義問有識

寄遵義別駕胡文

玉皇香案日親隨松坎桃源半刺宜官職聲名何
所比嘉陵江水少陵詩

分齋集

十

邊州只許三年住蠻嶠今從萬里遊懷白堂前歌
咏地耐他羌月半輪秋

長廊巷口馬頻嘶日日論文到日西一徑蒼苔門
館靜幾回閒覓舊年題

渺渺春風巴子國蒼蒼涼月廩君城經年小別天
涯夢南聽猿聲北雁聲

雪中憶樾香樓梅花寄余葭白試巖昆仲

海棠枝畔歸靈鵲金鰲橋上雪初作此時下直冷
欲僵差幸上車能不落士生適意須江南回頭孤

負寒梅萼不見來人問綺窗忽思高士憑孤閣閣
邊瘦石立如削一夜香生花濯濯十千沽酒我不
辭疎影曾分舊杯勺只今驛使無一枝扳折空教
夢如昨弟勸兄酬召友朋分題拈韻同爲樂莫言
黃紙未書名聊復滑稽齊善謔林逋若上封禪書
貽譏何異乘軒鶴才高但恐終不免入洛相逢俟
商略風味須知有短長尊羹何遽同羊酪

白下葉烈婦鄭夫人入祠詩

青溪溪上有哀猿珠館猶歸月夜魂烈士甘從金

分藜集

三

鏞死深閨能報玉釵恩桃花潭水衣香冷

殉節木于水

葉亭臯鬢影存簫鼓新祠表鄉井磨笄山是鄭家

邨

自題換畫圖

玳瑁裝成卷帙輕一瓶換得小滄溟山風欲起烟
欲滴二十四峰遮眼青

十載吟詩鉢肺肝燈檠常記夜漫漫年來泉石膏
盲甚不愛書看愛畫看

次韻和滄洲先生直廬偶成十首

共此圖書府欣為較閱人坐探千古籍思奮百年
身給札分黃卷傳餐出

紫宸承恩須努力非獨惜官銀

清曉趨丹闕黃昏散赤墀天書誠煥爛禁省自逶
迤晷短防時過羶寒逐暖移儒生合稽古况受

九重知

末學慚窺管鴻儒賴啓蒙編摩煩指點該括每豐
融勁翮留鷁列幽香冠蕙叢

聖朝需補袞公已繡華蟲余輩分修蟲魚諸書公為總裁也

分纂集

三

同列紛枚馬詩書飾太平詞華多斐疊意匠見晶
瑩接席分曹地聯鑣寓直情側身誠自幸竿濫轉
心驚

昨奉集賢

詔甘泉問答頻都俞盛世事淹雅夙心親莫長堯
階莢璿回舜日春海棠噪靈鵲一笑忽酸辛

董相天人策西京孰與過嚴親叨共第先君與公辛未進士

同小子沐餘波廡仕嗟無及遺文散已多追隨當

此日回首痛如何

慈母早衰白將車難北來阿奴留膝下嬌女得顏
開祿養慚升斗團團羨草萊夢中時定省雞唱又
驚回

大母依諸父劬勞守敝廬含飴思往事強飯喜來
書祖澤源流遠孫枝樾蔭餘報劉懷不寐耿耿夜
窗虛

十笏江村閣柴扉生薜衣田園別來久雲樹夢邊
微戚戚空懷土勞勞未息機右文逢

聖主竊祿敢言歸

分藜集

三

僦屋憑微俸欣然非賃春讀書多五夜爆直足三
冬冰水調官硯風聲聽禁鐘從公私厚幸非是宦
情濃

看雪同周寒溪前輩用東坡聚星堂韻禁體
物語

北風吹樹無一葉歲云暮矣漫空雪長安豪士獵
騎多臂韝鷹出飛禽絕吾曹瘦馬踏天街畏見道
旁車軸折映窗却喜紙偏明凍筆還驚字旋滅一
時斂袖共知寒縮肘不憂旁被掣紛紛猛勢撲眉

稜凜凜嚴威添面纈炙酒先燒豕腹鑄烹茶旋碾
龍團屑穿林入樹見俄頃填壑夷坑纔轉瞥濕透
朝衫亦自佳明年豐稔農人說歸來夢看壓疎梅
我亦廣平心似鐵

題紫幢主人寒齋讀書圖

凍雀寒花几格幽睡餘黃嬾費冥搜不須更說天

潢派只此當封好學侯

好學侯見晉書

天遣吾曹作此癡不論時節總相宜粗才孟德誠

堪笑只辦秋冬射獵時

分藜集

音

口如布穀喚春耕日日瀾翻課有程忽地沉吟新

得句又添皤腹古瓶罌

皤腹瓶罌古杜牧句也紫幢有集名古甌故云

掩書餘味在胷中

用陸句

俗輩休教識此公直恐畫

師偷樣去山陰團扇洛屏風

送方實村使君之任懷慶

使君千騎問絺城明月山光驛路迎花縣郎官爲

屬吏竹林名士是州氓村無犬吠惟安土社有雞

鳴要耦耕舊日吳公誇第一於今方叔出周京

詩卷牛腰書擘窠風流才調許誰過移情水竹前

賢後懷古商周往蹟多斷壁題時除石蘚殘碑看
處拂烟蘿中和樂職煩新語莫遣兒童唱舊歌

小集萬柳堂晚過南臺訪魯禪師分韻

城隅細路入平莎蠻榼有隨共踏歌寺倚夕陽人
跡少門排高柳鳥聲多半篙春水平於鏡一抹遙
山碧似螺多謝老僧扶杖出遠開筵口喜相過
一龕香火兩曼陀卓錫雲臺隱薜蘿櫪下晚嘶支
適馬池頭新浴遠公鵝元言莫遣沙成飯實理須
知名有柯記取去來閒歲月人間陳迹易消磨

分藜集

三五

昌平道中

天空日薄野雲長古戍平原接大荒萬里北風低
宿莽數聲寒雁下斜陽行依暮靄山橫碧吟過秋
林葉半黃未必堪留轉堪戀板橋臨水似江鄉

集介穀堂即席四首

試倒沙頭白玉瓶不辭相訪到寒廳年年握手開
雙眼却似西山一樣青

小郎巷口舊同君短燭聯吟每夜分割得韓詩堪
贈取兼金未足比清文

過我頻敲一局棋靜中風味少人知半簾日影常
爭劫注想都忘落子遲

懷抱瀟瀟正好開黃沙風裏共銜盃不須投轄誰
求去如此銷寒得幾回

秋雪入直和陳滄洲先生韻

黃花帶雪弄新寒鳩鵲蒼涼曉未殘隔歲麥秋誇
老圃一時酒價貴長安雁來榆塞嚴程早人攬貂
裘昨夜單却愛西山天半白金鰲橋上倚欄看

送劉艾堂前輩視學中州

分藜集

三

百蠻桃李已全收

方典點
試歸

又見檐車攬轡遊上象

文昌型四國八方弦誦會中州圖書興衍開京洛
冰鑑澄清出素秋鄴下不愁才不過先生原自是
應劉

西山秋老唱驪歌幾許琴書細馬馱路有青衿瞻
紫氣人隨白雁渡黃河盡知劉向傳經重若問中
原古蹟多三十六峰圍二室公餘吟眺定如何

序

昔王摩詰居輞川詠歌爲樂其曠致逸情爲開寶
間公卿名士之冠與裴迪閑賦山中稱迪天機清
妙此真古今詩人精諦維之謂迪者正其所以自
謂也吾友程編修泝江意趣簡遠頗與摩詰似往
與余同官庶常年甫三十入直承明退即杜門却
掃茗椀爐香有瀟灑出塵之況迨余以終養歸泝
江亦未幾以母憂還邗上邗爲東南都會習俗紛
囂獨屏跡郊園俯仰吟嘯讀書之暇雅好鼓琴善

香溪集序

一

山水所著篠園襟詠直與鹿柴南垞諸什接響嘗
蠟屐遊黃山由白門渡江經采石返岑川窮極天
都諸勝旣而涉桐廬富陽流覽西湖武丘至錫山
訪余偕秦葯師周大酉兩同年秉燭山行過寄暢
園飲天香閣下泝江語余曰此遊正摩詰所云不
急之務然是中良有深趣袖出紀遊詩一卷曰香
溪集宋羅鄂州新安志黃山湯池古名香溪泝江
先世家本新安因取以標其集蓋不忘所自也余
戰景九峰亦久與塵緣濶絕乃卒不免結轡窮愁

之態固有遠不逮泝江者泝江天機清妙殆有獨
得而發情抒臆實能絕去刀尺傲然有凌雲之氣
世之讀其詩者當必能於古人中知所位置焉夫
山川寥寂千載誰賞泝江遊而紀之以詩會且披
誦神往又寧不足為勝境增其重也哉同學年弟
杜詔

香溪集序

香溪集

江都 程夢星 午橋

將遊黃山取道白下

六合可遊心一室鄙容膝向平誠有情何必昏嫁
畢采山吾將行渡江不擇日擊汰駛揚舲風來一
鳥疾白門六朝餘列岫亂甲乙水上浮青螺即此
是膠漆黃山在何許意若天外出舍楫艤江沙青
錢買柳栗

雨花臺

香溪集

一望平原盡草萊六朝金粉冷於灰雨花亦是當
年事猶說高僧舊講臺

秦淮

東望青山似黛眉渡頭桃葉刺歌辭人家簾幙多
情思一曲秦淮盪槳時

雨後登報恩寺浮圖

劫火憑依塔火傳倚欄不問赤烏年猢兒去後開
初地燕子飛來入九天雨過江聲圍澤國風生鈴
語怨桑田高標只供遊人眼望盡齊州幾點烟

金陵道中

杏花委地柳絲牽，裝點江城雨後天。
忽憶故園春半處，竹邊初日淡棲烟。

采石磯

春風吹雲濤，怪石欲飛動。
渴驥勢奔泉，化工偶銜控。
時清苔蘚多，古往甲兵衆。
虞常安在哉，事等鄒魯鬪。
道大輸老僧，寂寞厭搏弄。
遊客時一來，不惜烟霞共。
我到嗟已遲，敢復去倥偬。
舉手語山靈，松聲衛清夢。

香溪集

二

李青蓮祠

不見開元李謫仙，樓高百尺枕江天。
將軍妃子無知已，明月青山有夙緣。
三峽杜陵同汗漫，四明賀監接風烟。
莫言過客光陰速，夜夜長庚到檻前。

大乘菴阻雨

簷端飛溜直如繩，寂坐荒村去未能。
寺廢尚留庭下柏，僧貧初斷佛前燈。
連宵裂紙風聲入，傍晚敲鐘霧氣凝。
支枕不眠嫌漏永，幾番春夢暗曹騰。

石碗曉發

路經九里十三盤掃盡雲嵐露翠巒正是滿山桃李
李候却教風雨變春寒

繁昌道中

雨趨岩溜聲淙淙鳳皇已去山亭空四圍蒼壁羅
高松隱隱炊烟出山塢隔溪彷彿聞人語怪我晨
勞似田父田父自忙我自閒寄興常在青林間且
得飽看江南山

半山亭

曲欄高倚翠微邊山帶斜陽障一川坐看小星橋

香溪集

三

下水流過嵩竺寺門前

望岑山

幾年清夢繞山鄉山鳥山花一道長未入里門須
軟脚青螺有約水中央

抵故里

風烟筆硯客裝輕山驛郵籤不計程初到故園生
似客乍經諸嶺舊知名逡巡村釀堪沽飲彷彿鄉
音未辨清邂逅春晴生麥隴山禽二月已催耕

登岑山

江山窟裏故居存，夙約烟蘿手自捫。堪共金焦分
鼎足，別從瀛海露雲根。碧流似帶環雙峽，青嶂如
屏抱一邨。欲借蒲團話幽興，與僧終日聽潺湲。

星巖寺曇花

佛以花爲供，於茲好結胎。偶然留色相，何處著根
芽。淨土香偏淡，春風晚自開。山僧解微笑，對客欲
拈來。

白嶽

五嶽祭秩齊三公，此山冷落名號同。譬如李泌非

臣工留取衣白山人風，平生大抵居雲中。客過竟
出排青空，杲杲日上扶桑東。四山雌伏專尊雄，撰
杖儼若朝齋宮。耳目雖戲心則恭，麋麝豺虎麩麩
狨山靈驅策潛深叢。天風浩浩疑豐隆，來自太始
無終窮。黃山相並夸龍從，若開丹竈烟光通。客意
饕餮兼魚熊，武夷君家橋如虹。安能借助聯空濛，
此願未遂行恩恩。黃雞白日歌瓊瓏。

道院聽雨

芒屨竹杖帶烟霞，來過青牛道士家。纔見野風吹

屋角不知山兩下簷牙半簾暮色催題句一院寒
聲助煮茶我是逍遙遊裏客未煩雲笈檢南華

休寧趙明府署中坐雨

縣官若時雨官閣雨聲來瀟灑宜詩客清寒見吏
才入疆無犬吠久坐有花開白嶽曾題壁煩君護

紫苔

虹梁喝看曇花

五年一開
適值其盛

虹梁未必居釋迦遍山入眼皆曇花客來相對不
宜酒爲佛受屈聊烹茶茶甘意愜與僧約年年花

香溪集

五

日來君家僧言此約恐相負五年始得生蒙芽世
間樹植期一載只有宿麥兼枇杷西池桃放三千
歲不足憑信疑虛誇曇花難得直如此我來正盛
非緣耶書生賦命萬事薄獨有遊覽偏交加君不
見東坡登萊見海市昌黎岫嶠開煙霞

將至黃山先寄雪莊老僧

問訊前山路山筇明日支試求蒼蘚石掃拂待題
詩

楊干寺道中阻雨

食蔗先食尾佳境乃漸來山靈靜以待不容躁者
哈七尺斑竹杖一緇赤笋鞵相將各賈勇驟進事
不諧朝來有爽氣行見霧雨霾何峰曰始信及此
翻疑猜方士昔入海求仙訪蓬萊將到風輒逆豈
我閒曠懷雨師未必妒好意清塵埃征衫接翠嵐
點點如莓苔譬尋駱丞菊冒雨正復佳鄙哉山陰
棹遇雪空自回

佛嶺

鐘聲引我到僧家竹樹蕭森一徑斜靜聽半空傳

香溪集

六

午梵閒看題壁有秋蛇樓前常設留賓榻岩下多
栽獻佛花香積不嫌供給薄細分澗溜淪春芽

湯口望三十六峰

一峰遊十日可作判年遊安得諸峰聚何如一望
收嵐光宜近水爽氣欲先秋指點虛無裏丹邱若
可求

湯池

古名香溪見宋人
羅鄂州新安志

五年前向溫泉浴湯山山下波如縠乍覺塵埃面
目除出山依舊塵沾足今日祥符溪上來靈泉湧

出近山隈霏霏暖氣帶烟霧應有丹砂結地胎涓涓石上流珠滑一洗凡疴淨毛髮再洗倏忽心胸清神爽身輕欲飛越名泉亦自產幽荒回憶溫泉北斗旁黃山元是神仙窟日沐月浴天蒼涼

雲谷

半日禪關裏烟巒面面開老僧穿樹去幽鳥破雲來坐見中峯雨遙聞下界雷自憐凡骨在空對古丹臺

擲鉢禪院看木蓮花

院即雲谷又名丞相原宋相國家元鳳公讀書處

香溪集

七

野航處處看芙蓉水風獵獵依菰蒲山中步履忽到眼別却泥滓開高株何時古佛擲鉢去及今禪院風光殊吾家相國昔寄跡不知已見開花無後來有人懶誦讀只狎老衲窺名姝高高十丈倚天半對客不肯爲當壚臨風似笑止惡詭一花一葉供跣趺花邊亦有采蓮女化作山鳥辭江湖

坐天紳亭望九龍潭飛瀑

匡廬之瀑天下無流泉三疊如連珠天都之瀑世罕有一一龍潭到八九銀濤雪浪渺無垠一瀉千

丈垂天紳老龍偃伏在潭底隱隱轟雷震人耳翻
嵯破壁走飛湍搖光弄影星斗寒我欲尋源時一
往躡屐支筇撥雲上天漿汲取解煩醒直恐猶帶
龍涎腥龍兮龍兮盛時出霖雨蒼生沛膏澤山下
雲雷山上月

指路峰

路轉峰回欲問津殷勤指點入松筠此峰不似桃
源水亂種桃花誤遠人

雲舫喜晤雪莊

香溪集

八

雲白峰青老閉關古稀夏臘尚朱顏參成七佛琴
絃裏拈盡千花詩句間畫就案間鸚鵡硯香殘鑪
印鷓鴣斑客來轉問山中路三十年前曾下山

宿雲舫聽雪莊彈琴爲余作雲舫聽琴圖因

題二絕句

精廬結在翠微邊一宿相留是舊緣雲影自來還
自去不知身在萬峰巔
久住都忘遯世情十年彈指付浮生更煩雲水瀟
湘手一和山中風雨聲

贈雪莊

了不嫌枯淡丹顏燦若霞
淪泉留勝客分飴餉靈
雅雲裏看峰慣松邊坐日斜
山中未無事一一譜
山花

題雪莊山花圖

凡一六種
皆人間所無

百花不欲天居功
騁妍秋雨嬌春風
毛詩爾雅不能盡
離騷本草恒疏通
後人踵事作圖譜
搜羅自謂英華空
豈知異花如逸士
不入塵世居
山中
中黃山最奇秀
至今風雨留鴻濛
一草一木有殊

香溪集

九

致恥與凡卉爭
豪雄俗人不見見
不覺慧眼只有
拈花翁每於日麗
山水綠便訪粉白
胭脂紅采葺
多至百六種
其數猶恨陽九窮
色香臭味久不著
圖畫意與傳燈同
一花五葉古宗派
別傳教外心
惺懺我來妙諦不
暇論且化蝴蝶窺
花叢

老人峰歌

山烟作霧朝濛濛
舉頭烟外見老翁
風開日出始破笑
一峯背俯兼頭童
何年南極下霄漢
無事僵立空山中
諸峰只算丈夫子
形體雖過年難同
絳

縣亥字不足道堯時丙子論卑崇平生儕輩恐無
幾匡廬五老齊高風世人少壯幾時好等閒倏忽
皆如公明星玉女峰無賴櫛風沐雨山花紅

耕雲峰

仙人亦抱耒耕雲雲不起牛嬾石田荒終古勞耘
耔萬朶金芙蓉葉葉白雲裏未知開闢時誰種青
蓮子

文殊院

腰脚欣便捷登臨任屈盤望時疑絕跡險極忽竒
觀怪木啼幽鳥深潭漩急湍文殊一片石蒼蘚染
蒲團

香溪集

十

話舊亭

京江張相國與
中州僧舊蹟

文字佛所棄佛名曰文殊此義可默契遊脚聊跏
趺院中禪板寂院外松影鋪會心正不遠慧業在
吾徒老僧道機熟無語供茶鑪入世忘出世試聽
山鷓鴣先輩張相國致君如唐虞此地曾訪舊結
亭話須臾丈夫勿役役且鷹猿攫呼文章即經國
亦宜味道腴塵緣幸淺薄前修有規模遠師香山

白近法眉山蘇隱莫大笑天地皆蘧廬

由雲舫至光明頂可十里許雲舫適在其下
時與雪莊約以擊鼓相應

祇在懸巖上紆迴上更難庵僧擊齋鼓飛越滿林
端天向雲邊盡山宜雨後看竟忘升絕頂但覺夜
深寒

登光明頂

十里幽踪藉杖藜光明頂上與天齊蒼松籟轉聽
逾靜丹竈烟荒望欲迷徑僻絕無春草發巖深時
有夜猿啼來朝還過雲梯去更裹行糧手自携

光明頂望天都蓮花二峯

書生好奇性命輕險路屢與山鳥爭青鞵布韞生
羽翼飛步山頂來題名頂高不覺天在上但見世
界皆空明一峯倏忽出雲表太華玉井蓮花生一
峯又復近天宇儼若大帝維都城乾坤結構無盡
藏意不相讓恒相傾蒼茫陰雨或不見此日幸掃
風烟晴不知相去各幾許拄杖商略堪前行得隴
望蜀苦不足詰朝相見留逢迎

上平天砒坐蒲團松

松舊有三枝爲人竊其一今存二各可坐一人

路長境逾竒心勤足轉惰意外得兩松似分獅子
座習懶不讓人人來餘一箇傳聞舊有三偷兒視
竒貨戲語學佛人三世來則那過去未來可現在
不許坐

鍊丹臺

一策衝蒼靄千盤上碧岑山寒僧亦瘦雲老樹常
陰大藥知何處丹爐尚可尋空餘幽澗裏飛瀑自
清音

香溪集

三

紫玉屏

在丹臺旁

拔地抽空削半山東來紫氣接雲端吳王小女飛
升後

吳王小女名紫玉

化作屏風護寶丹

將遊西海門未果坐蒲團松小憩

幾叢雲葉擁蓮花

雲葉蓮花皆峯名

竦竦穿林石筍斜更

上蒲團松頂坐飽聽山樂奏頻伽

山有禽侶若歌若答名山樂鳥

或曰此頻伽鳥也

天都峯

屹立蒼旻表中都軒后家山川聯障衛天地闕精

華石塔千秋在靈旛十丈斜分明通帝座惆悵暮
雲遮

沿白沙堤橫雲石經第一天門看松

入勝不暇懶所歷皆青蒼殷勤步雙屨磳确忘修
長雲沙表明秀風濤來清香舉首見松樹一一翠
蓋張疎影布道路餘綠侵衣裳卓午日色薄遙想
朱夏涼伏苓知幾許長鏡誰相將相看兩青眼大
材飽風霜天上種白榆歷歷非所望

雲門歌

香溪集

十三

三十六峯如公府南有雙峰作門戶象取并州快
剪刀剪斷人間俗塵土白雲來往日無時縞素漠
漠自太古離騷舊有雲中君三戶無人賽歌舞雲
藏將奈蒼生何一夕風吹天下雨

指月菴

倦足欣逢指月菴僧廊茶熟供清談此生安得長
無事分住彌陀一半龕

擾龍松

一松偃仰亂生鱗高臥山頭計幾春世上誰爲叅

龍氏強將松樹作龍馴

接引松

兩岸高臨一磴深，老松不惜度巖嶽。
可憐佛祖西來意，草木都存接引心。

獅子林觀西海晚照

法堂不問獅子吼，孩虎乳羊靜山藪。
石林宴坐晝漏移，白日方中倏驚酉。
林端處處紅如霞，一片胭脂下山口。
天清氣爽烟不生，地曠山空光更久。
羲和何官強測量，夸父癡兒苦奔走。
遊人間暇得竒

香溪集

十四

觀直待棲鴉入深柳

翠微寺

路絕忽生路身輕，直到巔嵐光疑墜。
地松翠欲浮天抱樹，猿窺客穿雲鹿趨泉。
聞鐘知寺近，只隔一重烟。

洋湖看月

普門僧欲創湖心殿未成

芙蓉峰下千頃湖，四山春漲天模糊。
白沙翠石鋪作底，惟覺泥沙無。
菰蒲客來水涸亦可愛，日云暮矣聊躊躇。
湖中轉瞬一湖水，湖光灩灩生斯須。
山

僧狡獪無實語請客看現牟尼珠一輪完好出東
壁矯首大笑驚棲鳧夜深野坐不可久安得結構
湖中區水生月出看更好不妨老作山澤癯

三仙石

三仙不可問三石尚流傳日夕山嵐起猶疑丹竈
烟

二仙共碁石

旁又一石
如觀者

松作碁枰石作人世間難得兩閒身一翁負手年
年看算過先天太極春

白龍潭歌

香溪集

十五

白龍潭上水烟白白龍潭下山光碧潭底沉沉直
倒天半腰猶見三千尺蝦蟆丁子不敢居夜半晴
天飛霹靂陰時漠漠水連空驚走山魃號木客山
僧說旱誇神靈老農禱雨期朝夕曰雨則雨晴則
晴不似人間求蜥蜴吁嗟乎蜥蜴易與亦易役龍
性難馴隱山澤

登始信峰

頂舊有菴久圯前朝江天一公
所書寒江子獨坐處不可得矣

遊屐不覺高飛鳥乃在下努力登層巔步步苔蘚

迺曠望日以舒倦坐山草藉何時有茅菴夢幻劇
傳舍墨蹟留誰何人事亦代謝一切有爲法難久
只可乍徘徊松風生天籟共悲吟

下始信峰尋散花塢過石笋石

峰頭別猿鳥峰下接雲烟要問拈花路兼叅玉版
禪勝窮憑意得境過付詩傳行脚山僧事吾生本

性田

出天門望天都諸峰

朝曦隱隱射天關窄徑才過得好看一簇晴雲堆

香溪集

十六

石罇亂峰如畫粉初乾

鰲魚洞觀雲海

黃山何好奇雲氣乃善幻山海有常經流峙無端
變三十六峰峰離離衆峰羅立兒孫齊白衣蒼狗
是何物等閒滅沒空瀾瀾麻姑昔話東海淺北公
亦欲高山移直今天地釋兩憾惟憑夜氣清風吹
當其初起時膚寸渺一綫忽然盈四周鋪張淨如
練紛紛兜羅綿閃閃鷺溪絹萬頃蒼茫截掌平朝
暎倒映扶桑絢豈有神鬼鞭天吳江妃河伯來呵

殿或者古佛募地開袈裟何止玉女披衣石郎弁
人生壯觀苦寥寥局趣轅下道路遙風橫瀚海三
更雪月瀉錢塘八月潮此景邂逅不易得得此始
足誇騰超振衣一嘯破昏曉烟鬢漸出啼山魃

一線天

終日人戴天不知天廣大偈仄入山間昭昭示蒙
昧坐井者誰歟眼界須靜會星辰見幾多日月亦
偶在即事狀奇險山靈似天外

天漏巖

香溪集

十七

巖疑巨靈開石謝女媧補遊客不須晴常看漏秋
雨

出鰲魚洞經天河達天海

六鰲戴大地一洞安足容窮幽轉愁思欲豁芥蒂
胸出谷聞天河但無水淙淙平夷漸入海何年見
朝宗山中少巨浸晴沙稱洶洶蓬萊渺無際銀漢
如相通我本江湖人久已辭塵蹤說梅亦止渴適
意扶孤筇行行且渡海落日挂遙松

由觀音坳上小心坡

山水不設險俗客應盡來到此仗佛力恐爲佛所
哈振衣逐猿狄飛步登莓苔大士不可作安得同
徘徊前坡更戒客客心無崔嵬康莊有覆轍險夷
理可推

桃花仙桃二峰短歌

兩峰相對如葦曹一花一實皆名桃世間花實不
及待此豈有意誇相遭仙家各要三千歲人生幾
何屬望勞何如同時化石長留天地供遊遨

迎送松

香溪集

六

獨下雲峰路不平飛泉一道石梁橫深山原不關
人事錯認雙松管送迎

又題木蓮花

雲英九葉雪膚光別作瞿曇益庶香自信結根原
不染何須濯水挺花房

忠州白雀歛黃山

忠州白雀山佛殿前
唐時有木蓮二株

兩地都開

佛國間絕似玉盃擎露出留將仙客換朱顏

桃源洞

洞裏何曾別有春枉題好語賺漁人世間盡被虛

名誤逢著桃花莫問津

只愛迢迢水一涯武陵未必便仙家遊人但取春
時節流出溪來看落花

慈光寺

即硃砂菴

僧寮那得有仙丹舊說丹砂似可餐若使葛洪知
此地不須勾漏遠求官

重過湯泉

不垢亦不淨何心戀此泉只因前逝水聊作後來
緣源有丹砂氣蒸成薜荔烟伐毛兼洗髓辛苦笑

神仙

香溪集

十九

宿祥符寺寺前林木鬱然清泉澄徹乘月與
客步至溪上吹笛飲酒頽然竟醉

我來十日遊黃山身輕足健欺飛仙日晚下宿祥
符寺慈光已隔青雲端探竒陟險意未足竊恐山
靈嗤我頑夜雨晝晴快行屐山水於吾原不慳寺
前竹樹劇蒼鬱倚松坐嘯何其閒爾時林杪露新
月娟娟如挂白玉環山童弄笛客按拍清歌婉轉
聲淒然回望天都矗天表諸峰不見空雲烟心神

悄絕四山靜惟有澗底流寒泉人寰遊覽等閒事
雪中鴻跡難留連家鄉有夢不能割重來更擬凌
孱顏

返岑山與里中一二耆舊話遊歷之勝兼以
留別

黃山不厭客客久辭主人家山聊偃息父老還留
賓山川有大小情意無疎親殷勤問險易次第舉
嶙峋浮生混朝市何曾清心神及此始自媿纔洗
半世塵山靈不我拒猶幸有前因雲開踞山頂水

落坐澗唇魚鳥或不到耐險何敢嗔太古想開闢
經營費艱辛世事苦未了無福遽隱淪舉趾易登
陟公等誠天民岑山一拳石即此亦足珍山花與
山鳥歌嘯宜秋春漁樵供伏臘雞犬通比鄰縱或
耳目隘要之風俗淳吾心亦易足且別問去津重
來結後約此語憑松筠

岑山八景

澄潭夜月

潭底空明約幾尋碧天無際影沉沉夜深寂寞魚

龍靜照見姮娥萬古心

石耳晴嵐

山色空濛雨亦奇

用蘇

山嵐尤好是晴時請看石耳

嵐光起非霧非烟苦盡師

西溪春漲

前山一夜雨瀟瀟洞口泉多似長潮溪女報增三尺水亂翻松影帶花漂

北岸丹楓

秋老山中落木空誰教留得錦屏風天寒曳杖人

香溪集

三

來少只映溪南一水紅

遠浦雲帆

片帆天外遠微微斜曳溪風掠釣磯莫怪行遲船較重載將一半白雲歸

沙渚漁燈

平沙淺渚盡漁罾日落烟昏但水腥過客不知敲石火鷺鷥歸去一天星

岑樓晚鐘

寺樓烟外倚孤松日薄西峰翠靄封山鳥正來天

色晚驚飛樹杪一聲鐘

遙山積雪

山樵偏喜雪消融積素何知在遠峰十日東風吹
不盡要留粉白助青松

七里瀨

七里瀨激聲潺潺船行石罅隨彎環合江亭西山
萬點綠雲曉夕妝新鬟山間勁草風勢偃百丈牽
江牽去聲力軟飛泉四出不知名天半銀河傾絕巘
人家三五傍巖居半是山樵半野漁密樹丹黃通

香溪集

三

浦漱閑鷗高下點芙蓉憑人指點山腰路懷古峙
峴愁日暮東漢能容老客星西臺肯種冬青樹招
招舟子休苦辛汝歌子和不辭頻明朝且艤清溪
櫂與爾同湔萬斛塵

舟中望龕山

歸意自闌散篙師無迫促越絕東海濱諸山所聚
族偃者如萍浮仰者類槎秃蒼波展鏡奩萬髮若
新沐龕山出群姿正照篷窗旭延綠野岸移宛轉
孤峰綠登臨徒挂口烟翠已在目素脊隱精藍朱

柑出修竹丁丁樵風幽泠泠禪版蕭蕭溪香流浮花
裊宵三百曲山有太古清舟閱短景速挈音忽已
遙未盡他年續

桐廬道中

艣聲嘔軋雨闌珊夾岸回風過幾灣百里煙深因
近水一年秋早爲多山路尋鷗鷺無拘忌客與漁
樵約往還多謝子陵遺釣瀨半生纔淨舊塵顏

自漁浦挂席至富陽

茫茫海若從東來潮頭百丈聲如雷一杯相酌忽
過眼青山白舫同徘徊江平無風櫓自急雙鷺近
人沙際立銜魚不動頂絲飄已覺輕涼生習習水
籤未下日未曛蒲帆十幅張秋雲平生幸已謝塵
埃此行况見桐山君一路漁罾挂蘋渚未必高人
似堪語灘多川激等閒過回望龍門在何許水烟
綽約來青鬟前到瀧中更幾灣大癡粉本居然在
一簇疎林帶遠山

東溪源口

雨後流泉響不停淺沙澄碧柳搖青鶯聲正好忽

飛去不管詩人恰要聽

雲棲

靈山結想十年前
禪版遊筇始作緣
人綠鬚眉全是竹
晴喧風雨亂奔泉
地高漸覺江聲近
峰遠猶聞梵唄傳
吟盡夕陽歸較晚
清池應愛遠公蓮

遊紫陽瑞石諸山

朱明劇炎溽所在遭
熏灼結伴山中行
天風鼓橐籥蒼崖勢
憑陵俯瞰欲騰踔
蜿蜒神物姿怒走
那得攫谿谷上危磴
氣猛失孱弱綠蘿垂
可攀兩手

香溪集

五

遞牢捉峰迴防掉頭
徑轉戒落脚丹嶂五
丁開茲焉思剷削曲
蟠到山巔心目兩展
拓襟帶纏江湖金湯
抱城郭勝窮道心生
習靜坐菌閣山禽向
客呼舊遊記林薄古
壁曾留題苔蘚已斑
駁陳迹俯仰間重尋
手捫摸松扉誰何家
猿攬得剥啄澹泊謝
輕肥乾坤許棲託吾
輩縈塵囂苦被微官
縛昔者隨時賢多事
較清濁歸來賦遂初
鑄鐵或非錯十日忘
淹留嘆惜此間樂却
歎打包僧行復裹芒
屨別山如別人預作
數日惡安得買山居
悠然老

邱壑

丁仙亭

野鶴山人非俊物，忍棄溪山學丹訣。丹成合作地
行仙，青山爲主君爲客。洞口蒼苔雨後深，岩端紫
竹風中裂。只今踪跡渺茫茫，獨騎雲鶴歸瑤闕。臨
行作偈付妻子，却恐多言轉饒舌。鶴去天空不可
留，玉釵夜冷寒山月。我來一笑羨劉綱，幾人夫婦
仙同得。

吳山晚眺

香溪集

三五

寺樓高敞踞遙岑，一望瀟然散客襟。月上海門通
夜白，雲歸靈隱半湖陰。岩端鍾乳常凝雪，塔外天
風自語鈴。吳越蒼涼無故壘，早鴉零亂暮煙深。

西湖

西湖百過不嫌頻，西子多情似故人。鶯老有聲邀
結夏，柳長無絮憶尋春。水生白舫茶瓜貴，風起青
帘歌管新。客到未須諧世俗，淡烟纖月話前因。

宿韜光菴

樹杪韜光路，蒼涼淨客顏。半窗湖上水，一塔鏡邊

山清境閱人代孤雲自往還蒲團容乞取有味學
僧閒

湖上懷古四首

宣公墳墓鄴侯祠功在唐家中葉時紫誥風雷煩
大手白衣涕淚出危詞忠能結主終遷客智託求
仙豈本師商略古今同漢代張良善去賈生悲
元和元祐兩分符乞郡無聊亦自如燈火長橋蘇
學士荷花遶郭白尚書大都詩酒為官職未見風
流誤井閭南渡傷心遊事減斤歸將帥老騎驢

香溪集

十六

湖邊不遣岳墳孤又見于公墓一區各有神功扶
社稷同歸鬼火照菰蒲姦回鐘鼎淪黃壤兒女椒
漿奠綠蕪日暮更須江上望銀濤白馬怨勾吳
一聲鐵笛起滄浪遊女皆知客姓楊兵甲乾坤容
野老湖山風月屬詞場席聯吳越必籌亂座有倪
黃筆硯香千古林逋休獨步後先同配水仙王

虎丘

山靈不必皆嵯峨虎丘一石誇槃陀遊人舉趾易
登覽託根得地臨官河吳兒喜事工點綴層樓傑

閣交青柯圖本似仿李思訓種樹或倩郭橐駝山
僧放誕遊女衆有如天女叅維摩曉風鐘磬暮烟
鼓春天羅綺秋宵歌我來剛厭值朱夏差喜便靜
堪吟哦吳王白虎總寂滅魯公仙鬼同銷磨名士
亦無短主簿倡子和汝為誰何延緣宛轉山後好
平疇曠野鋪青莎蛙聲閣閣市聲靜風吹白袷衣
生波人生事事須開闢遊歷亦莫落白科山前不
愛愛山後何人有唯能無呵舟人催客將解纜柳
絲月上辭山阿

登湯山

香溪集

三七

拾級騎危與客同憑高四望入遙空山根石齧潮
痕白海面雲烘日脚紅沆瀣果能呈蜃市蒼茫自
可化琴工三生記贈支機石倘有浮查吾亦東

松陵舟中對雨

垂虹亭外水如烟浴鷺飛鳧正渺然細雨打篷人
倦起曉來經過太湖邊

泊無錫久雨水漲民居半在水中

傍水人家戶不開篷窗高欲並樓臺不妨竟作張

融屋直可牽船岸上來

同秦藥師杜紫綸周大有晚過錫山林亭

曲曲漁邨憶舊遊
晚雲籠日雨初收
畫船只愛垂楊裏
又別當門水畔樓

飛鴉歸處近斜暉
山引湖光接翠微
池上但容鷗鷺侶
洞邊常挂薜蘿衣

空中乳水不虛傳
試茗同煎第二泉
多謝杜郎能好事
夜瓶分餉過江船

牆角流螢照水明
竹深荷淨晚涼生
竟牀笛簟琉璃滑
聽徹檐前快雨聲

香齋

天

山擁雙鬟翠作堆
爛銀波面捲雲來
晚風忽起菰蒲亂
閒趁歸潮打槳回

薄暮將至毘陵阻風

短篷飛雨濕烟凝
日暮荒邨泊未能
撲面風來吹不斷
一星漁火認毘陵

丹陽道中

風定潮平細澱生
丹樓高峙轉孤城
過江倒數江南路
丁卯橋西第一程

京口

峩嶷鐵甕擁朝烟浪濺苔磯獨棹船明日蜀岡窮
目力隔江直到此山巔

瓜步歸舟

片帆瓜步月指顧綠楊津歸日乍逢夏遊時忘過
春六旬山水窟千里畫圖身柔櫓鷗波好無勞浣
客塵

香溪集

三九

序

昔仲長統論樂志潘安仁賦閒居其辭若恬愉冲淡使人有屏棄埃壒之意乃跡二子之所終皆以簪紱負累爲世所竊笑彼豈徒托之辭哉其中無所自得始雖暫寄高閒久之而遂動於名位所必然也泝江先生早入詞館遭逢盛世與二子所遇不同而樂志閒居之作在二子當日所自期而不果者先生且兼得之以優游林水而歌咏太平此暢餘集之詩所爲作也蓋先生自丙申歸田後

暢餘集序

一

築篠園於揚州之西郊其地爽塏閒曠竹木交蔭憑虛望遠可以淪性靈而外形役扁舟雙屐往來其間爲事也簡矣爲志也約矣志約故氣舒事簡故神愜宜其發於聲者廣而不溺斂而不枯無佞也故秀遠而不繁縟無憂也故幽深而不結轉世之讀是集者充然足以見其中之所存豈不使二子遠媿於千載也哉暢餘園中軒名取南史劉靈預語因以氏其集云丙午初夏十日錢唐厲鶚

暢餘集

江都 程夢星 午橋

讀史六首

妍媸無定姿愛憎成是非愛者易為容憎者未可
譏漢成遇玉環或者嗤其肥三郎得飛燕恐嫌不
勝衣文章亦復爾請看韓昌黎何物段成式竟易
淮西碑

二

屈原有讒口楊億蓋得君一字不合意遽爾親疎

暢餘集

一

分晚唐令狐綯知遇不以文當日中書堂貽笑坐
將軍無怪苗君卿有硯竟欲焚草元轉投閣嗟嗟
揚子雲

三

公孫舉賢良先棄後乃收鬼然且第一晚封平津
侯陸贄舉韓愈亦以再舉售其論不貳過即以前
文投一君與一相夫豈異雙眸取舍自錯互際會
良悠悠

四

李廣旣閒居射虎宜藍田馬援旣老棄解甲殊安
便壯心不能已又復事戎旃出處不自慎母乃馮
婦然失道終對簿蕙苴死蠻天鷲鳥一不中所以
輒回旋

五

韋氏偶谷隱得號逍遙公幽栖本自晦何至名姓
通潛德正爾難儉牛名牆東韓康至賣藥女子知
高風不如履道宅隱顯得其中終日但醉吟心迹
自太空

六

暢餘集

二

海上三神山秦漢常求之求之不可得惟聞方士
辭仙人亦狡獪隱匿乃若斯但保好山水富貴夫
何知後世有桃源避世對花枝四皓終一出孤負
商山芝

題三叔父空江片月圖

山頭孤月影涓涓浪靜江空夜悄然一片寒烟吹
不散白鷗橫過釣船前

截江嵐影遠拖藍小艇夸猶酒半酣十四年中彈

指過荻花一碧夢江南

壬午秋從叔父省試月夜渡江今十四年矣

百里澄江徹底清故山山下暮烟橫何當醉臥吹蘆管一和西溪飛瀑聲

人日集虛白山房用人日題詩寄草堂四平

聲字為韻

歸向江湖號散人年華物候已驚新輕寒乍減才辭臘小歲偏遲未破春靜愛風烟多淡岩晴看松竹亦精神芳時朋串家鄉樂紀麗先書自丙申

賀客盈途競刺閨連朝辭避喜招攜詩徵舊事才

暢餘集

三

何減人聚佳晨數恰齊

時座客七人

彩勝自添新歲意

草堂曾檢故交題吟情漸逐韶光動古錦為囊付

小奚

為懼七日豈嫌遲炙火加綿晚更宜白髮不隨芳

草變青尊先與早春期梅含薄霧將舒笑柳滯輕

陰未染絲何必辭家逢作客花前雁後好成詩

藤蔓成帷石作牆窗生虛白照山堂綠醅滿泛玻

璃滑黃韭新攢餅餌香茗飲試煎前夜雪彫胡重

煮隔年糧

鄉俗除夕炊米以供新歲之用

當筵共作忘形醉客散

留髡亦未妨

初築篠園

有竹近十畝故以篠名

造化付禰性卜築忻幽栖五塘遠城郭延佇塘之
西清陰忽到眼風來時高低猗猗十畝竹宛轉蒼
苔蹊佳哉適我意足以扶我藜寧復待邱壑然後
堪攀躋夕陽自相度畚鍤呼童攜野外無華屋茅
茨開荒畦柴門臨野水槿援連長隄寬閒留餘地
種樹青鸞鷺昔者竹林下傳有阮與嵇自顧非其
人難免凡鳥題春秋集兄弟餽餉有菜妻茫茫天

暢餘集

四

地內永聽候禽啼

篠園十咏 小序

園在郭西北其西南為廿四橋蜀岡迤邐
而來可騁目見者栖靈法海二寺也上下
雷塘七星塘皆在左右因得夕陽雙寺外
春水五塘西二語書為堂聯即以為十韻
之次

今有堂

謝康樂山家詩云中為天地物今成鄙夫有何古非今即今成有遂以名堂

林野有清曠天意闕荒僻偶然落吾手榛莽條已
闢長嘯愜幽懷於焉樂晨夕

修到亭

環亭種子梅百本花下可布十餘
席幾生修得到梅花謝疊山句也

誅茅面高阜種樹南山陽先春挺孤秀一一凌雪
霜因之結夙契竟體凝寒香

初月沿

池半規如初月植菡萏畜水鳥其中
跨以畧約激湖水灌之四時可不竭

蟾影織如鉤下照白石淙向夕池上酌一瀉傾春
缸鷗羣久相狎來往時一雙

南坡

築土為坡亂石間之當今有堂
之南其高出林杪躡小橋而升

暢餘集

五

杖策過危橋拾級上空翠曲膝急春流前林出高
寺遙見耦耕人攜鉏話農事

來雨閣

竹塢之西閣可眺可咏知
舊能來當不問今雨矣

萬个羅清陰蕭散人境外舊雨時來遊一徑入烟
靄風細殊不聞嘹然發天籟

暢餘軒

啓菴扉而入平軒三楹以觴以奕劉
靈預答竟陵王書云暢餘陰于山澤

託暮情
于魚鳥

歸懷在山澤好景無冬春孤賞白日靜佳趣已畢
陳永言暢餘陰企彼羲皇人

飯松菴

堂之北偏雜植花藥繚以周垣為
偃息之所故多松其秀色可餐云

山客了無營提筐拾松子食之潤毛髮清芬味如
水願與素心友共此烟霞髓

紅藥欄

芍藥以廣陵為最近無好事者西軒
新植數十本雖無奇種亦自可人

不見廣陵花一別歲云五豐臺擅奇艷所惜浣塵
土歸吟紅藥詞移種及春雨

藕麩

欄檻之外一籬界之其外湖田百頃遍
種芙蓉朱華碧葉水天相映毛詩麩與
通漚

采蓮去東渡鼓柁下迴塘日晚歌聲起滿湖風露

暢餘集

六

香落月冷葭葦夜宿湖中央

桂坪

暢餘軒多隙地桂三十樹移自白
門密葉濃陰皆可愛不必花時也

天香發遙夜山月方銜西森森坪間桂綠葉含丹
萸連蜷不自闕招我成深栖

蹋青詞

蕪城城外草青青沽酒旗亭半醉醒花裏管絃翻
水調軟風吹過竹西亭

當年十萬腰纏地人海爭營致富方一曲邗溝溝
水上年年鼓笛賽吳王

雷公塘畔花滿蹊歐公堂上山禽啼人背夕陽排
馬去搖鞭嘶下綠楊堤

春光逢閨得勾留兩雨風風妬未休甚欲嬉春寒
尚峭刺桐花下木綿裘

與彭尹作前輩曹聲階同年暨家弟懷舒鈞
奏登平山堂用壁間漁洋先生韻

葦岼搖風水帶烟扁舟重訪舊林泉幾年夢繞城
西路一桁山橫雨後天柳葉迎人放青眼松花如
鈿落春田頁瓢更欲行吟去往事如叅倒縮禪

楊餘集

七

午日感懷次肅村三叔父韻

舊時家宴慣分曹節近菖蒲興自豪底用吹噓逢
狗監不妨遲頓補羊牢何人更解師元亮於世還
宜倣伯高且折紅榴浮綠酒莫嫌雙鬢漸刁騷

徐文長鳩硯

青藤山人不可見手迹摩挲石一片林端喚雨春
啼鳩恰有春鳩鏡石面當時幕府任伴狂千尺光
芒在柔翰白鹿文成動永陵朱櫻館廢歸山縣可
憐鬼語人不知但博方山牘尾判藏書萬卷散無

存此現應嗟人代換我初得之廟市中千錢那復
論貴賤清泉蕩滌光如鑿終有文瀾發璀璨吁嗟
天池老死文字間一硯隨身徒自銜吾曹此病亦
自知什襲翻藏作珍玩終朝弄墨磨人剝削天
和死不變後人得此復何如石不能言對長歎

重襖

風雨無端妬好春重逢襖日愛芳辰最容易事偏
難得添取春愁一番新

浮生三萬六千場節序關心此艷陽莫負春光百

暢餘集

八

二十正須一日一流觴

效陸天隨酒中六詠

酒池

醞醕滿文瓷雲濤蕩烟翠牛飲復鯨吞千人一時
匱炤影頗自得臨風嘿然醉胡爲老渴羌却戀廢
圍吏

酒龍

金虬劇噴薄玉液流天漿霧蒸鱗甲間風動聞馨
香時垂領下珠酣卧壓糟牀祝爾更爲霖大地成

醉鄉

酒甕

隨時得醇醪虛中雅能受善釀羊稚舒速成得未
有擘泥香自清撥醅味逾厚誰召生徒來飲之以
五斗

酒船

日營麩藥事歲入七百稊便須稱醉侯直載入壑
谷泛濫洞庭春一夜東風縮拍浮了此生濡首始
云足

暢餘集

九

酒鎗

折脚任欹側嗜腹殊膨脝拾薪燃活火暗浪鳴春
聲第云中聖賢敢道濁與清莫令徐景山千秋專
其名

酒杯

浥彼鸕鷀杓注此鷓鴣卮熟視天壤間圭璧不足
持却笑何水部眼底曾未知底須酌瓊粇青娥捧
花瓷

謁座師徐大中丞浙江四首

殿幄傳經久東南寄股肱非關外汲黯多是重徐
陵鬢鬢風雷白聲華日月升江湖看賜履清絕九
秋澄

二

封域兼元白淵源接洛閩蠶桑通婦子禮樂出黎
民風俗希三代安危慎一身普天論四岳大業在
斯人

三

會稽西漢郡符節控揚州今日三台座遙聯百尺

暢餘集

十

樓清風及吳楚時論服陽秋盡頌東西浙乾坤有
十洲

四

絳紗諸弟子淪落轉相親入境雞豚足看山鳥獸
淳門清閭祭戟道在重陶甄立雪何人事如今盡
是春

雨後泛舟入篠園

夜半蕉葉作清音推枕起視天將明一聲布穀掠
窗過似呼犯曉同郊行筓鞋蒟帽桃竹杖與我相

狎偕平生今朝正自不煩爾屋溜乍有淙淙聲浮
家泛宅我所有久旱水絕苔花縈出門幾步得水
次一篷兩槳新潮平野鴨習懶睡未起無端水荇
牽風驚踏波拍拍響雙翅浮萍衝過波痕清此行
岑寂賴爾破笑眼未轉園丁迎小園人外本幽寂
渭濱千畝紛縱橫兩餘膏沐更明媚靜對不語聽
流鶯

園居雜詩十首

託根但清遠得地不必寬規規十餘畝幽居亦便
安避地非我事賦性近林巒蕭晨有佳色陰晴皆
可觀牧犢者誰子長歌助余歡隔籬方靜聽風亂
青琅玕散髮倚修竹卽事樂考槃

清曉山雨過園丁報花開徐徐步我屨倚杖立青
苔按名徵月令南山殷其雷農人知春及負耒去
復迴不耕生內愧惟願年無災自省但節約奢亦
無餘財牀頭有薄酒酌花只一杯

有几可讀書有緡可釣魚晴明臨曲沼陰雨坐敞
廬鄙人寡道氣聊自求清虛事減心自息意暢體

以舒伴我有雙鶴步來翎自梳對之亦足喜交情
無親疎丁寧安飲啄慎莫慕軒車

啄木啄古木有如客叩門恐嗔不出應起視隔短
垣寂寞亦思客但愁來高軒高軒顧我厚小犬驚
花村野老負手過開口談雞豚其言雖鄙俚氣淳
顏且溫舉手揖上坐耦耕庶可論

樹小不及待樹大難以移偶繙種樹書潛心求所
宜方法難盡信畢竟雨露滋萬事任自然消長自
有時松柏苟失所何敢望菘菹詩有草木疏易有

蒙屯詞故帙且尋繹先聖不吾欺

暢餘集

三

人生各有病我病乃苦多玩物慣留意觸目時摩
挲古器落吾手古人今如何遽廬視天地棄置毋
蹉跎園林亦一物繫累差勝他草木天所授候禽
時清歌淡蕩遠嗜欲杜門眇庭柯

四時皆有花客來留茶瓜風味特寒素頗近山僧
家門前一湖水游舫載琵琶日日厭酒肉鄙見毋
乃奢榮枯各有性不必挂齒牙好花開且落靜悟
無鬻譁客去自拂几開卷讀南華

暮烟聞梵鼓朝嵐來齋鐘比隣有雙寺舉步叅南
宗習懶乃靜坐盤桓惟孤松蒼顏保冰雪歷劫無
春冬山僧若修慧舉策當吾從爲儒莫撓舌但愛
新陰濃黃雞忽午唱何如商璫瓏

偶把一杯酒時鼓一曲琴曲半或中止醉卧深竹
陰沉冥足怡悅此義自古今世道重禮法何足累
一心白眼視天壤風來披我襟興酣或得句起舞
自高吟驚出山雞飛衝落木林檎

入門理杖屨出門話桑麻咫尺八蜡廟祭禱聞鼓
笳春秋雨暘好豈惟利農家農家愛稼穡吾亦愛
吾花同爲天地物長養無殊差年來苦旱曠憔悴
到蒹葭願結雞豚社報賽隔籬笆

胡蝶花

剪得輕綃勝六銖微風有意掠纖鬢誰將芳徑翩
翻影補入滕王舊畫圖
開時雪色染初勻月地雲階舞態新胡蝶莊周都
夢夢可知同是此花身

古渡橋晚眺

城角春蕪帶暮烟
偶攜芳榼踏花田
雙鳩啼過橋西去
羃地垂楊夢雨天

過虛白山房

叩門雙屐響空林
過雨苔階滿地陰
春峇潑來持醖
綠晚烟浮動入簾深

漢銅印歌

印為謝前義藏

漢鼎一隋烟
蒼茫殘尊缺敦聲皆荒唐後人好古
長太息略餘細碎
惟銅章銅章官印不足取
紛紛部曲尤尋常
羊頭羊胃授侯尉
不堪摩弄堪悲傷

暢餘集

古

披沙揀金重私印
小篆名姓時端詳
鉅公顯士固

寶惜冷人何必輸
班揚東西兩京四
百祀貢金三

品分低昂赤金鑄
錢兼鑄印

三代秦漢以上皆以銅為赤金經史甚明

印精銅好當時藏
星移物換苦零落
高山深谷幾

銷亡土花薄
蝕恨轉愛如土埋
沒偏光芒曉天半

白晚霞紫野水一
碧秋花黃可憐
顏色爭媚嫵有

賣安得無傾囊
一二枚舉亦富有
百千羅列誰禁

當詩人好事謝胡
蝶晴窗位置閒
清狂腰下不必

綬若若肘後亦復
神揚揚吁嗟乎唇
焦舌敝佩六

國何如書生弄印居文房

冬日送郭雙村北上

北風七日雪歲晚治長駕寒淚灑征裘白雲空子
舍別酒殊淋漓浪鳴咽不得下壯夫志四方安能事
耕稼佳境終當逢譬若倒食蔗

因時感蟻爵飛伏各有適此生分既定何許容巧
擇百事倘求全轉苦天宇窄君本謫仙人雲霄應
未隔鳳池待回翔會須生羽翼

安溪師相枉過篠園即席限韻

楊餘集

五

八荒皆化域半畝見天工鷗泛清波上車停密樹
中近郊新霽迥遙岫暮烟籠海內須霖雨林間有
惠風窮經齊董相好士接歐公仙李蟠根處遙思
向日東

送安溪師相暫歸閩中

上相論恬退元非太古風臯夔盈虞廷未聞邱壑
通降而周後禮懸車聽臣工此義蓋體卹臣心有
匪躬公也輔景運都俞致郵隆藉如左右手夙夜
在法宮引年不見允致身惟始終老思穎上去恐

異歐陽翁畫錦不足道言歸胡匆匆萬里有邱墓
孝思明其衷一德許暫去海嶠修且崇四海觀盛
事中途接愚蒙久恥獨學陋幸坐春風中信宿又
拜別吉日車已攻三江與七閩道路南復東前驅
誰負弩到日荔子紅故鄉風味好且食蛤蜊同東
山得幾日移孝還作忠小子如斥埃去來迎送公

花朝水邨舅氏招集平山堂

小時遊歷隨外家山堂詞客如雲霞

追憶外祖蛟門先生舊事

也轉頭老輩盡零落我復落託離京華歸來偶作

暢餘集

六

文字飲堂前引客飛新鴉舅氏詩好得家法清美
風味兼茶瓜春深况復麗風日無名野草皆開花
隔牆簷鐸忽自語清音何必呼箏琶

議復保障湖舊蹟

誅茅近蜀岡東枕長湖曲每苦葑草繁頗礙鷗鷺
浴昔聞此湖水淪漣千頃足豈惟利灌溉荷芰供
遊目自種青泥芹遂令沙嶼促馭夫競刀錐勝蹟
未易復憑誰挽清波貯此呀然腹小艇時一來高
吟倚修竹

東柯草堂種梅移自白下

山館寥寥一院斜，把鋤和雨種梅花。
移來白下江邊樹，辦作西泠處士家。
曲逕晚風初釀雪，小窗疎影欲橫紗。
莫嫌此際寒枝瘦，暗結春心已有芽。

送同年徐亮直奉使琉球

玉簫金管出蒹葭，遙指琉球道路賒。
萬里王程全是水，幾番公醮不經花。

亮直壬辰探花故戲云爾

含妻日問三

山島一笑人誇八月槎，東望滄溟烟渺渺。
恩波從此到天涯。

扶桑日出見詞臣，才是東方領袖誰。
得入騶經里巷，不藏半綬見鄉人。
堂前白髮開尊好，時便道為太夫

頌達楓宸

題畫

野岸春晴繫短篷，等閒得句對東風。
水窗臥晚不歸去，身在一溪紅雨中。

徽州城東二絕句

昔年被酒城東路，敗柳殘荷兩岸秋。
稍喜歸來猶

較早輕烟細雨又孤舟
城邊依舊草痕青良友招攜得再經
冷笑芙蓉同臭味曉風吹出鏡香亭

次荅顧秀野枉集篠園

時自粵中來

得歸亦復佳耽閒寧待老郭西數畝地課力日勤
掃湖山近當眸每出必迎曉敢云野趣多聊遣塵
襟少何期到高蹤翩然貴林沼不辭人境外霜徑
踏寒艸別來三二載思君夢縈繞楚水波蕩搖粵
山雲縹緲新詩攜一卷豪健壓郊島道遠遊則壯
才高名不小壺觴集羣賢竟日共傾倒望後月尚
圓林端已皎皎君家美園亭陋矣此叢篠

東園八詠

其楮堂

喬木蔭虛堂入門失塵想秋氣日夕佳平楚正蒼
莽不見伐柯人衆山滿清響

八山樓

拾級巡危欄振衣躡高閣坐對南山南空翠入林
薄等閒風雨來雲氣白簾幕

西池吟社

曲沼環西池琮瑋鳴以瀉桂子落秋衫寒如山雨
灑招月共清吟開尊風露下

分喜亭

半畝犁春雲田畷亦吾耦鼓腹行且歌帝力知何
有浩然賦歸來古人不相負

心聽軒

齋居兀無事日長小年永吾心古井水山光淡雲
影天風半夜吹妙悟入虛牝

暢餘集

无

西墅

西蹊桃試花紅樹綠流轉無語笑東風飛香落蒼
蘚欲問前度人烟中辨雞犬

鶴丁

此鳥詎可籠幽柴接烟渚雖懷稻梁恩終戀江海
侶多事笑乘軒凌雲任遐舉

漁菴

澄淨愛秋潭架屋倚崖側遊魚簇浪花水痕細如
織向夕獨垂綸忘筌亦忘得

泛舟紅橋晚歸

店香誇酒飈青旗獨愛茶烟弄素瓷菰蔣滿湖晴
放鴨秋風無恙記前期

青溪碧草兩悠悠酒地花觴易惹愁月暗玉鉤人
散後冷螢飛上十三樓

米家舫子只琴書秋水新添二尺餘一帶管絃歸
棹緩橋邊簾幙上燈初

中秋過樾香樓與余葭白對月

累得奇礪澗嶺徵鉤簾小閣坐忘身年年松桂婆

暢齋集

十

娑影難得閒如我兩人

為葉引若洪詠懷醉後解嘲

渴鯨爭向一尊中入醜欣看琥珀紅對月何妨連
日飲破愁須是十分空遲歸不覺寒侵面晏起應
憐晚避風惟有公榮還獨醒醉鄉未得與君同

題楊大瓢鄉思樓小照

囊書走四方帶劍行萬里風塵變客顏辛苦職人
子一屢寄吳門八口資十指故鄉莫能歸舊業風
雨洗明明頭上月不照鏡湖水鄉心雜離憂百端

紛未已勸君勿復然且醉揚州市揚州月如故但
少簫聲起

題唐六如畫韓熙載夜宴圖

韓君本是不羈人唐生畫筆工傳神生綃一幅劇
綺麗華堂高宴開芳春紗帽籠頭意軒舉手挽雙
袍夜撾鼓後閣氤氳香澤濃賓筵雜沓繁歌舞歌
喉宛轉舞袖輕生徒雜坐吹驚笙官錢月支日不
足賜緡散去難爲盈迷花中酒寧易得誰道猖狂
竟遭劾可憐乞食聊自污老向江南望江北一朝
左謫授分司表上不報空增悲羣伎盡遣旋復集
肯以宰相輕蛾眉唐生唐生豈畫手自寫傷心亦
八九圖窮掩卷起巡檐風流安穩庭前柳

送安溪師相還朝

日月亦易邁山川亦易過等閒六月息袞衣別烟
蘿朝廷方虛左那得怡庭柯太平固無事亦自須
賡歌闡水駛湍激閩山叢嗟峨跋涉不憚險精力
弘且多回思疇昔日山鬼弄干戈精誠走間道較
此夫如何時危振人紀時平修天和三公往論道

八荒無偏頗沙隄亂燈火百爾望鳴珂過化揚子
渡惜別理則那羽儀入鳳沼淮海空清波

初食笋

一林烟雨潤春蔬上番新挑四月初園客踏將蒼
蘚破籜龍穿動白烟虛錦褪後斑猶在玉版叅
來味有餘莫遣東風吹作竹渭川千畝意何如

宋繡達摩

小果何堪語勝緣袈裟留得印心傳金針度處無
文字五葉花從一線牽

暢餘集

主

巧手絲盤五色勾鬚鬆卓朔狀無分老公不契斯
人旨北去嵩山面白雲

題畫馬

駮駮橫門道上塵何如散牧綠楊春支公自昔憐
神駿不受人羈更可人

送樊悔庭遊西江

大江西上古洪州新雁初來君遠遊帆轉預愁黃
葉岸尊傾小別菊花秋彭郎嫁娶途中問孤鶩翻
飛望裏收幾度夕陽吟不盡詩肩常聳柁邊樓

送郭冶峪先生入都

兩載辭京華故鄉稅歸駕高懷本蕭閒况復依子
舍王程忽敦促未許戀桑柘匆匆治行李擾擾畢
昏嫁才大官則卑祿僅敵耕稼由來造化心頗頗
忌閒暇寒月涉征途濃霜糝朝瓦同心幾輩人別
酒共傾瀉有子渥洼駒公車侍晨夜行空冀北羣
一擅千金價把袂臨祖席重觴多慰藉願言踐清
華盛名傳日下

篠園結夏用有字

暢餘集

三

夙性愛疎冷結夏宜林藪六月暑氣清即景得良
靚遊鑣散高原行艦入疎柳顧茲篠筵徑蔽蔭可
十畝清泉注巖曲頽響出溪口風生茅棟間流雲
依北牖永日得嘉賓談諧無不有緬懷河朔飲傾
此一尊酒

引水灌池用東坡水車韻

轆轤咿軋驚田鴉吸如渴驥奔如蛇白浪翻池沒
孤鷺綠痕上岸侵寒芽潯泓澹沆明秋沙羣峰倒
影森排衙安得連朝一天雨常令屋角懸溝車

自題小照

望入秋原晚氣涼野雲消盡樹蒼蒼此君素有癡
情性獨立橋西送夕陽

人嫌蕭寂投閒住自喜疎慵及早回到處青山有
平素不論新舊雨能來

次韻王勿翦篠園卽事二首

只有林泉好難言一畝宮艾荷猶歷亂松竹舊蒼
葱揮麈南堂晝敲碁北牖風蕭蕭池上酌垂柳漸
烟籠

暢餘集

五

妝點頰花藥西風艷此庭水紋留淨綠山影送遙
青蟲自驚秋響舟因候月停城陰繁麗外野色晚
冥冥

初月汧畜雙鴛鴦悼之

小池聯影惜花翎偶隔寒烟尚斷魂戲水正齊紅
蓼岸在梁那折碧波痕羞隨鷗鷺雙飛去莫見芙
蓉並蒂翻我亦莊生濠上樂鯨魚愁見月黃昏

深港黃氏林亭看桂花

凡二百餘株
皆百年物

秋光未老秋風涼拂拭筆硯紗帷香月中老樹慣

勾引繞廊倚柱還循牆庭中豈無一兩樹薄少不足煩壺觴匪兕匪虎樂曠野一瓢一笠求高岡小山佳境不易得細港有路聊相償黃家亭子隔林見兩足未到傳芬芳亞枝接葉一色樹略減八百成都桑古根鬱律盤地厚新梢突兀參天長寒蟾老免一株足不知勝負曾衡量修行不過衆香好跂脚容我夸羲皇淳于斗石不願醒蒼苔醉倒同匡牀村童扶客林影暗不覺白露沾衣裳

題白沙村移居白下圖

暢餘集

五

六朝山色卜閒居宜稱幽人計未疎稍闢空庭留夜月多留隙地種秋蔬去帆結伴長江雁停棹開樽上市魚舊日西河詩序在不妨家具少於車

八月晦日重過深港看桂花

幾日來遊尚未殘開尊花下繼清懽林深得地忘年歲榦老橫秋自屈盤零露暗和金粟墜晚香應共石牀寒此時惜少如規月醉卧江郊恣意看

哭同年顧十一秀野

世事不可料譬如風中花紛紛開且落飄散各一

涯我生本枯木無端發春葩淪落得天性自適甘
泥沙吾子才不世一出粲菁華雨露方滋茁何遽
折蒙芽一官無足論此減彼或加著書冀可老閒
居年壽賒人無金石固白日影易斜彼蒼不憐遺
奪之胡速耶平生好汲古蒐集如亂麻元詩得闡
發尚以未備嗟草堂向出賃梧竹秃杓枵賣文始
贖得猶計種茶瓜二者苦未遂乃駕粵西車作詩
記行邁狂吟驚麀麋人生但如此送日亦自嘉如
何神形瘁餘氣僅到家矯矯雲中鶴燦燦天半霞
側身騁南望一水帶蒹葭挾琴賚美酒何處求靈
槎空步隋隄上悲風起暮鴉

暢餘集

三

七月七日陪李明府遊古禪智寺寺故有東
坡送李孝博使嶺表詩即用其韻

新水可泛鷁末伏猶喧蟬連岡抱近郭遠水浮輕
烟佛廬隱林隈客屐排崖顛風從平野來日傍高
松懸捫碑識魯公題詩憶蘇仙快值雙星期言陪
百里賢楚材播芳聲蜀脉移甘泉岸蛩早淒淒城
月方娟娟歸途已茗芋後騎多聯翩菰蒲敲石火

已有漁燈然

寄懷都門諸同年

性冷寡交際氣合亦樂羣同年有情好此語古所
聞生長異鄉縣出岫無心雲無端得會合暱就惟
論文長安盍簪地孤袂亦易分取我青松塵著我
白練裙華裾付公等柴門送斜曛當時舊紫陌往
還誰紛紛珍重素衣色無受塵氤氲燕山高岌岌
淮水寒沄沄千里共明月別離何足云

遷甫先丈因病止酒詩以勸之

暢餘集

三

酒人之於酒契若漆與膠周旋不暫離那可輕云
拋若以病止酒病豈酒所招試問不飲時病亦未
必瘳^叶先生素羸弱畏同蒲柳凋歷今六十餘與
酒成久要一日不得酒壘魄何由澆却彼二豎侵
賴此五斗醪縱令致上頓意興亦頗豪醉者况神
全其樂恒陶陶誰言布覆篋只喻肉受糟要使形
神親勝地故自超且須事杯鎗勿為陳暄嘲

題汪溪翁濯足圖

曾倒詞源過七閩一生操履淨無塵老來猶濯溪

邊足似笑當年陰子春

望中雲海白重重一道潺湲映萬松潑刺波鳴亂
搖影不妨赤腳侮蛟龍

納梅

磬口檀心出妙香別從凜冽鬪幽芳百花前輩推
春蕊不及霜前月下黃

寂莫山齋自撥醅笑看寒萼壓春開蜜脾自作枝
頭瓣不是遊蜂釀得來

可園探梅

暢餘集

天

昨日探梅城西北一樹寒花笑迎客今日探梅城
東南幾株素萼橫蒼巖春來遊屐無虛日到處有
花成莫逆主人瀟灑啟園扉收拾香光入詞筆祇
愁零落飛香塵花片隨風早謝春願花歲歲留春
久爛醉不辭杯在手

會葬座師武進趙恭毅公二十韻

吾師人中傑山立不可搖中外三十載寵辱隨風
飄世人或異論愛憎久乃消豈易調衆口要惟我
後彫松柏勁直性清籟恒蕭蕭顯榮守淡薄辛苦

居雲霄始終抱一德身困名以饒當其大星隋淚
下紛羣僚吏胥初厭苦卒哭息謹囂吁嗟此匪易
所以感舜堯禮臣論卹典令甲有定條當時乃破
格異數高斗杓

天子特命奠大官賈酒澆有子誤遭死不礙令名
昭桑東得吉壤馬鬣封今朝盡禮見子弟會葬到
芻蕘星也門下士負土畚鍤操炙雞與絮酒和泣
陳山椒桃李根不固深愧栽培要惟執三寸管白
日賦大招

賜餘集

无

西齋詠石 限詠字

西齋一片石晶瑩若明鏡何年昇之來壁立挺瘦
勁古苔紫欲侵叢篠綠自映羣石雖崛奇偃側不
敢並當呼丈人行袍笏致恭敬摩挲點而光扣擊
清可聽時有雲烟生霏霏散林徑獨與幽人期無
言發孤詠

送亦諧上人歸南屏

到來瓢笠已秋深又憶雲山返故林貌瘦不關新
病色詩清如證舊禪心春風黃海閒攜屐細雨蘄

城冷聽砧他日扁舟湖水上蘿軒松徑欲相尋

題八叔父漉酒圖

百事舉可廢惟酒不可無一日如不飲便覺形神
枯當年陶靖節葛巾常沾濡叔也得高致做法情
浩如甕底潑春雲的皪垂明珠日夕事杯勺病醒
亦歡娛叔飲可數斗星飲不滿壺但識此中趣豈
以多寡殊醉鄉天地寬不飲計則愚願言隨叔氏
永與塵網疎不見籍與咸同醉黃公壚

蝗

暢餘集

三

野人擊壤歌時康曰雨則雨暘則暘冬來旱乾偶
然耳宿麥便已生蝻蝗蝗生未必與人事五行志
不煩推詳唐殷時世無缺失水旱亦復憂堯湯周
官典教不可廢惟要農政時隄防近來捕蝗匪細
事一一下令官循良捕蝗一斛米一斗村兒田婦
勤相將可憐婦子好身手薄少得馬多亡羊一蝗
九子日夜長冬且如此春安當屈原天問求問此
年年蜡祭煩壺漿稷神社鬼恐曠職上帝板板天

蒼蒼

懷方石川前輩視學蜀中

別緒亂不記卽事恒相思比隣存海內畢竟傷天
涯昔者在井邑不識長追隨承明共出入燕羽無
差池停雲苦易散舊雨不可追揚州芍藥地花名
愁將離離懷况已久不獨在呆愚西望七千里劍
關啼子規文旆入喬木多士得良師蜀中不逮古
近日文起衰教化足經術餘事應有詩江山正得
助可憶故園時故園依涿水接我新茅茨簫聲隔
楊柳是君絕妙詞

往在京師聞方扶南論紅橋詩以石川簫聲隔楊柳五字獨絕

暢餘集

三

謂爲六朝名句

輕波我獨往過門恒遲遲出處雖異路鬢

髮各有絲

晚登康山

城隅舊蹟剩荒丘郭外垂楊暮靄浮幾日風流似
帆影纔張已過屋東頭

急難片語見交情放浪才名意未平夜夜秋風動
梧竹至今猶作琵琶聲

去聲琵琶聲

紅橋晚泛賦得落日放船好同用船字

柳陰蒙幕夕陽川一棹城西破碧烟殘雨遠收雲

浦外餘霞低映酒尊前
芰荷風自浮輕幔羅綺香
多過別船試把湖亭比
河朔不妨閒醉一年年

哭遷甫先丈

君子貴氣節文詞蓋其餘
淹淹九泉人誰復思曹
蜍江表有先文避世勤讀書
不爲名求志惟隱居
生長菰蘆中跡與朝市疎
冥甘棄置那得兼熊魚
紛紛天地內一一飄華裾
賤貧何所樂荼苦安可茹
古書適在手君言舉徐徐
白龍偶魚服遂至困漁且
魯門設鐘鼓亦復喪鷄鶻
所以守我節无咎亦无譽
嗟夫此志士秋雲高卷舒
方且歛之道而已返其初
昔者柳子厚先友記相於
君交愚父子得不題其閭
詩文况兼善倡汝曾和余
臨風一灑淚白露溼芙蓉

休園

三休著司空名園想遺老
避地構亭臺選勝鑿池沼
風檣隔城闌烟岫列江表
森然園中木手植今合抱
長廊行轉紆曲逕淨如埽
時聞幽鳥啼未許俗客造
廣陵多園亭易世半傾倒
誰能數傳後邱

壑永相保翩翩賢主人神致見清矯賞心媚寒葩
夢吟發春草當軒列奇石圖書坐圍繞壺觴招我
來境勝情彌好乍經獲殊觀重遊展遐眺愛之不
能歸永日洽言笑繫予鬪五畝本以護林篠方茲
僅十二齊大邾鄆小巾車向林巒出郭每清曉何
如延望間極意得幽討君雖簡交遊未必厭頻到
更欲挈同人步履訂秋杪

席上有贈

桃花爲骨玉生香耐可當筵薄媚娘唱出銷魂天
寶曲雨淋鈴共漏聲長

暢餘集

重

小字多應是阿侯最勾留處轉生愁不知檀板金
尊畔更有誰稱菊部頭

燈炷重挑酒半殘清狂起座倚雕闌紫雲就裏知
誰是莫遣分司帶醉看

子野情深喚柰何玉箏聲裏憶秦娥十三嬌小春
風面不似孫伶笑阿婆

四座傳觴笑語頻一枝瑤草易驚春窄衣短袖紅

蠻錦小妹雍容最可人

李波小妹
字雍容

歌喉宛轉總連珠
薄薄紅妝半有無
若使白公當日見
李娟張態一時輸

哭郭雙村舍人三十韻

馬援功名盛乃懷
馬少游人生老鄉里
允矣第一流
吾鄉郭仲子
自少非常儔
才大隘井邑
舉念天閭遊

先帝昔南幸
右文時旁求
獻詩傍雕輦
召試近宸旒
自此扈從入
冊府手纂修
待詔金馬門
遭逢誠千秋
物白易受玷
薰孤不敵猶
一第本易致
反遭

暢餘集

三

忌者讐困頓
老塲屋十上一不收
天語屬選人得
官豈枚鄒性情本
跌蕩意氣百尺樓
長安米貴地未免
困乏愁
陶令思五斗
不容謁督郵
東方薄一囊
偏教同伴優
男兒貴適意
安可空拘囚
以此恒鬱鬱
生死隨浮休

先帝又晏駕
病中號咿嚶
感恩不得殉
惟望歸山邱
嗚呼官不達
不足爲君羞
嗚呼壽不永
不足爲君尤
君詩苦在篋
未及付彫鏤
子姪文而貧
那得布九州
早若守牖下
山田猶有秋
多收十斛麥
或

可自為謀出處兩不遂九原可作不寢門盡一哭
閱世誠蜉蝣茫茫寄天地莊生誇髑髏百感了無
益山陽笛悠悠

喜喬元溪妹夫至自都門

何期春盡忽言歸一路梨花作雪飛憐我十年悲
社日見君千里覲親聞知因捧檄情偏切若說思
尊願尚違聚似搏沙容易散明朝依舊著征衣
酒場零落舊時人莫忘紅橋賦冶春一水烟深留
客恨半林風軟趁芳晨魂招紅藥吟懷減郭雙村
舍人卒

暢餘集

三

於京師淚溼青衫見面新時桐城方扶南
南歸將過維揚遙指水西
村舍在耕餘何日結比隣

花朝同沈厚餘杜紫綸唐赤子王集李

氏林亭分韻得樹字

春事半欲殘兼旬臥風雨寒色妬花朝杏靨紅未
吐多情屋角梅香雪剌瓊樹初日散朝陰巡檐屢
延佇不惜衝街泥辛勤集芳墅地僻遠囂塵晝閒
招靜侶有客來幽燕亦或自荆楚旣愛東陽沈復
狎城南杜挑菜及茲辰午飯熟青茹鳴琴坐巖壑

傾尊忘賓主風雅已歇絕高會久未覩何意同心
奇懷欣共剖

紅橋冶春詞十首同杜紫綸作

十里春風舊得名小橋猶覺最多情輕波一往無
才思偏帶垂楊又帶鶯

遊人爭喚酒家船兒女心情更可憐未出水關三
四里家家開閣整花鈿

不厭朝陰愛曉晴園林相倚百花生紫紅杏白休
輕喚簾底防人認小名

暢餘集

三

彎環一帶轉西灣漸近紅橋船尾銜胡蝶欺人貪
悵望等閒飛上碧花衫

橋上衣香橋下風吹來十里雜花叢紛紛舟子偏
輕薄撐過橋西又過東

小部清商隔竹籬籬梢斜插酒家旗舟中買醉誰
腰笛賭倚新聲換譜吹

水澗陰濃愛草河停船都有雪兒歌纏頭不計紅
綃數只要教人喚奈何

法海橋頭酒半闌水嬉烟火盡餘歡笑他避客雙

鬟女一半褰簾側鬢看

狼藉杯盤日已晡琉璃燈出點紅酥水中博得人
誇影一隻船過一串珠

月黑迴船打十番一聲長笛起高寒遊人漸倦居
人聽半暗紅燈照倚欄

送唐改堂前輩入都即次留別原韻二首

十年睡足愛田閒盛世難容桑者閑鈴索有聲天
渺渺海棠無恙露潛潛春生秋扇隨新令霧久朝
衫檢舊斑別鶴重歸西太乙不須顧影戀家山

暢餘集

七

滑稽臣朔莫言饑回首邱園遁已肥官冷且思連
萼好謂飯恩深敢惜一身微久疎禮數寬前輩漸

老功名愛夕暉若使清時終看菊東籬應笑主人
非

雨後廿四橋晚眺

雨洗秋空新霽時夕陽偏向遠林遲橋西落葉行
吟去記得樊川七字詩

風送昏鐘隔水聞蒹烟蘆雪共紛紛更無人識湖
村裏唯有飛來白鷺羣

聞黃山雪莊僧故

談禪不必談無生學佛不必學忘情情之所鍾在
我輩誰能遣此無淒清憶昔黃山初著屐寂寥呼
友惟流鶯山中忽得雪莊老快如朝霧逢新晴某
山某水不問路一花一石皆知名就中奇花又得
譜冠巾吾黨安能爭乾坤有意生此老何妨日月
同彭鏗山鬼跳梁乃忌刻至使斷絕齋鐘聲後此
游事莫可必列岫無恙誰當迎此身血肉無不壞
淨名三卷堪嗤評黃山黃山山盡石齷齪黃土無
凡瑩千花成塔白沙上遙思高坐空崢嶸

暢餘集

三

書謝前義詩後

六朝王謝稱齊名論詩以謝為高門大謝小謝皆
俊逸至今六義垂後昆揚州近日盛風雅二唐兩
宋兼騰騫後來好手有謝子別開生面無陳言元
和李賀才幽絕九歌山鬼同飄翻當時乃得鬼才
目人世不住排天闔謝子恐是再來者才如月挂
梅花村孤清疎冷烟火絕回看熱境同炮燔造化
小兒誠俗物不容孤鶴垂高軒鄉舉進士不得進

科名僅以明經論少年脫略無不可豈知海霧霾
朝暎嗟哉已矣復已矣開卷欲哭聲還吞兩間何
處寄逸響杜鵑啼罷啼哀猿青天咫尺不可問秋
墳鬼唱方黃昏

清明後小集竹里草堂因傷吳侶張觀察

幾日浮生共酒卮蕭蕭風竹有前期花飛紅雨憐
新節人老青山感故知曾記雪泥鴻有迹又逢春
柳鬢添絲尊前莫笑瞢騰客愁絕聽歌獨醒時

題符幼魯所寄王鹿公畫翠袖修竹圖

楊齋集

三

空谷何堪對暮雲佳人偏覺意殷勤大都情性如
名士忍耐天寒愛此君

日斜脩竹動清風吹白胭脂不肖紅薄袂也知人
冷澹勝他長袖舞吳宮

平山堂燕集用韓孟會合聯句韻

禮經索居愁易爻盍簪重倦遊朋方來未見意先
勇孟夏艸木稠空郊羽毛聳駕言神輿輕寄咏心
源涌懷抱茲以開山川昔多壅郵函易寫憂把袂
難接踵舊雨憶東西停雲望邱壘既結良辰懼轉

生後時恐薄俗趨利場吾輩讀書種晤語斥煩囂
論文戒閒冗塵外敞虛堂松陰弔詩塚

先外祖汪蛟門先生

墓向在堂側

蹟勝往古遺風和惟日寵嵐影過平疇江

光挹雕栱俯瞰志自怡歷險魂無恟柳枝初嬋娟
吟情爭供奉諸君收駢羅鄙材恥癭腫緬懷北宋
時即此南榮擁橫笛官奴吹擘箴營妓捧散步聽
春鷓閒謠荅秋螢走或張籍僵立似孟郊虺咄哉
維歐蘇惜乎欠轍鞏當年少唱酬同儕想雜鱗至
今共登臨千載使惕悚世遠蓬卷風地靈芝茁茸

暢餘集

早

何期集梗楠遂令燦珎琪高會盟晉齊兼才得蜀
隴酒痕衣淋漓墨瀦案清溶放狂謝羈疆脫略笑
拘拳逸韻有流傳得法在嫡冢公等抽繭絲我獨
困蠶蛹九萬鵬應搏一足夔亦踊蝸舍老藏身鳳
巢看養飀蕩蕩天門開坦坦大道甬漢上且題襟
人海行洶洶

篠園新篁

春來辛苦護龍雛要作篔簹谷口圖一笑成陰須
歲月幾回留筍禁庖厨隔宵雨長當窗出橫野風

低信手扶待得干霄憑客看不知肯問主人無

寄懷唐改堂前輩飯山館丈

六朝重兩到北宋傳二蘇盛名今視昔聯翼栖碧
梧丈夫抱才略安得老菰蒲致身霄漢上行賜紫
與朱惟昔數晨夕今日天一隅悵望復悵望搔首
時躊躕同調無多人君家兄弟俱回首文字飲寧
復同提壺淒淒動北風風吹蕪城蕪寒綠一以變
飄散如吾徒不知聯牀夜聽雨憶我無雁來當有
書寂莫山澤壟

暢餘集

望

喜同年錢我持過晤即送入都兼柬徐集公
世路浩烟海友朋幾浮萍風雨一飄散聚會波冥
冥我家在邗水君家居西泠葦間有挈音沿緣可
揚舲把臂竟不易相去嘆逕庭剝啄復剝啄應門
啓我扁無端得子過快比宿醒醒問子何所適爲
言趨朝廷朝廷方翹材子去宜勿停且復小延佇
話我寒莎廳回頭數弁潤歲時忘丙丁鬚眉幸如
故那可守沙汀况子才蓋世沉酣史與經當日有
試帖鼓瑟傳湘靈盛時更一出不待卜寸筵干將

與莫邪自此應發矧揣分我藏拙寂莫守元亭譬
如東隣女但看嫁娉婷故舊若問湖干背笈簪
白甘白首白遙望青雲青

陪趙秋谷前輩集飲東園時桂花盛開

一聲長笛趙倚樓半規淮海維揚州相看不厭兩
有意春風秋月三生遊清狂昨日杜書記藍輿今
喚門生求黃龍山寺今在否木犀正復香而幽此
中有理在鼻觀叅透端賴聞思修先生善詩兼善
飲杯面直得天香浮偶然杖屨領後輩名言玉屑
風颼颼日斜靜對飲醇坐天外飛過雙閉鷗

楊餘集

聖

歸畫行

憚南田著色山水一冊余向以書集易自
王大蕩林藏之將十年矣無何爲偷兒竊
去越二年馬二橋堂招遊紅橋云購得之
復以歸余感其義作歸畫圖系之以詩

百事過眼如雲烟山林鐘鼎皆隨緣一生愛畫入
骨髓得喪未免情縈牽南田艸衣趙昌筆變格忽
復窮山川公孫大娘舞劍器出自撒手尤輕妍我

初得之我好友換馬但恨無嬋娟牙籤付去那顧
惜一時好事人爭傳歸來几案共晨夕鱸香茗椀
相周旋從來懷寶動遭忌鼠輩詎肯留青瑣貫休
吝未捨連老長康痴乃空桓子巧偷豪奪雖偶爾
夢蕉覆鹿都茫然事窮力屈惟一笑對人自調疑
通仙今年清和愛首夏馬君招我城西偏葦間延
緣逐漁釣沽酒不惜青銅錢晚潮過雨鴨頭綠夕
陽在山臙脂鮮撫景憶畫忽太息此我故物來當
削馬君聞之叩始末事有缺陷猶能全爲言前年

適買得歸我並不煩陳編亾羊失馬情頓異喜躍
幾落紅橋船秦庭忍棄連城璧齊人竟返龜陰田
物情隔面見更好况復友誼同纏綿得魚得兔均
我利先後王馬如蹄筌丈夫一飯亦有報我窮報
德惟詩篇從來冷性畏炎熱一夏執筆張空拳西
堂蟋蟀已八月秋雖未爽差安便竹陰露涼螢火
亂北窗風細蛛絲圓聊爲長句苦搜討疎簾清簟
支頤眠緬想寓意不留意珊瑚鐵網誰能捐忘情
太上不可到去來無住叅枯禪

家松門過小齋見子歸畫行有春潮夕陽之
句以爲詩中有畫爲之繪圖詩不足道也畫
則可傳因作詩以記其事

昔者揮毫張素壁老氣九州橫莫敵衆松離立走
蒼虬陰晦常愁飛霹靂至今相對清心神墨瀦依
稀秋露滴得隴望蜀豈無心買菜恐君罵求益連
朝苦雨天乍開忽踏莎階響雙屐坐我短榻讀我
詩謂我新詞入畫格解衣礪礪興淋漓滿紙雲烟
亂紅碧春潮過雨夕陽鮮我寫二三君十百筆補

楊餘集

四

化工畫有詩直追摩詰勝疇昔當年杜老佳句多
王宰不見傳徵迹家有名士三十年刻畫無鹽作
秦虢人情得意抵三薰知已何殊加九錫晚晴天
外景益奇更寫雄風帶雌霓



